

總目

- 行政組織第一
開放盟旗羣臺第二
招墾第三
設治第四
軍屯第五
清丈第六
優待蒙旗第七
墾荒指南第八
牧畜指南第九
雜錄第十

墾政輯覽

察哈爾全區
墾務摠局編

設治第四

叙論

昔漢通西域置酒泉武威張掖諸郡唐太宗滅高昌而置西州克高麗而置遼州凡其撻伐所及必建設城治以資控制蒙疆爲古游牧地自元魏北逐高車遷新民於漠南開置六鎮而邑居始見於史傳遼則概以營衛部族而奉聖歸化諸州幅員修廣宅井加隆惟以昔之形勢言則非建設城治不足以誇耀武功震懾遠人以今之政策言則非建設城治不足以整理庶政教養兼資吉黑各省同處邊疆前清末葉稍知注重墾殖政策而設治繼之成聚成邑蔚爲都會遂浸稱爲農商業繁盛之區察區墾政自四年奉令改組以來放墾之地約達數萬頃榛莽之野變爲沃壤荒僻之鄉漸成村落苟不設官敷治以立教養之法而樹控制之基則城郭未完保護難周殊非政府殖民實邊之要道也是以商都設治於前兩翼設

治於後賡續進行日起有功戶口逐漸增殖地方藉以發榮由游牧而邑居躋草昧於文明雖曰設治伊始政具未備廛市未宏而作始也微將畢也巨他日驅車原野熙來攘往見夫都邑相望闔閭相連禾稼登場人民樂業當必有往復流連而不禁今昔之感者矣

都統呈 大總統擬於現放大馬羣羊羣地方設立招墾設治局

推廣墾殖保護商民以資治理文

(墾務總局承辦堂稿) 四年八月三十一日

竊據察哈爾墾務總辦龍驤興和道尹兼墾務會辦單晉祿財政分廳廳長兼墾務會辦嚴汝誠呈稱竊查本總局現在開放大馬羣暨羊羣界內大段荒地以三百六十弓合地一畝計算約地萬數千頃若以二百四十弓合地一畝計算已在兩萬餘頃以上節經由局派員勘丈編號列表布告招墾在案近來請領各戶甚屬踴躍類皆富有資本之公司此外零星小戶勞働農民自行領墾小段者實不多觀推求其故由於荒段距離縣治大都寫遠或盜賊出沒搶劫官府無從保護或界址毗連游牧蒙漢時起紛爭是以農民苦無保障商賈視爲畏途亟應選擇適中地點設立招墾設治局一則推廣墾殖興闢地利一則代理訴訟保護居民又查張北縣所管之四台興和縣所轄之五六七台陶林縣所轄之八台各地方所

有荒段迄未盡墾私墾盜佔訟案糾紛均以距縣遠清理艱難國課既多損失良民亦不獲安堵應卽一併劃入連同新墾巡撫羣羊羣界內大段荒地另爲一區東至馬羣中界西至蘇尼特南至三台北至九台東西約計一百六十餘里南北約計二百三十餘里統歸新設招墾設治局局長管轄就近招放新荒清理餘荒並准援照縣知事兼理司法事務暫行條例及縣知事審理訴訟暫行章程代理所轄境內一切訴訟事宜至境內所駐巡防軍隊招墾設治局局長亦應有會同該管統領節制調遣之權遇有墾務民政財政司法各項要務仍令稟承墾務總局興和道尹財政分廳長審判處長分別辦理遇有重大事件亦得逕呈察哈爾都統示遵似此變通辦理則保護非託空言而墾殖亦可推廣查現放大段荒地佔領商都牧羣較多擬請定名爲商都招墾設治局擇定七台乾井梁地方爲設局地點借用台站官房卽由本總局刊刻木質關防一顆文曰商

都招墾設治局之關防查有前奉天候補同知現充察哈爾張北墾務局局長吳恩溥心細才長熟習墾政堪以試署商都招墾設治局局長俟試辦一二年後荒地墾成地租收入較多卽請改爲商都縣並以現署局長坐補知事藉資熟手而示鼓勵至現時開辦暨常年經費暫由本總局於所收荒價項下墊撥另擬開辦及常年經費各項概算表冊報部候核並會同興和道尹財政分廳長審判處長妥擬各項專章發交該局長遵照執行如荷核准他日開放大段荒地應卽援案辦理庶幾積戶成鄉積鄉成縣積縣成省之計畫自可逐漸實行不致徒託空言謹先繪具商都設治局所屬地方簡明地圖呈請轉呈前來宗蓮查察哈爾地處邊陲幅員遼闊方今綏邊政策自應以墾務與設治並行前於呈報巡閱事竣文內曾經瀝陳鈞鑒該總辦等所請設立商都招墾設治局並請揀員試署局長係爲推廣墾務保護居民起見除將簡明地圖分咨內務財政農商司

法各部查核並令編造概算妥擬專章呈候咨令外理合具呈伏乞
大總統鑒核訓示遵行謹呈

大總統批留任署察哈爾都統兼墾務督辦何宗蓮呈擬於現放大
馬羣羊羣地方設立招墾設治局推廣墾殖保護商民以資治理
而興地方請訓示文 四年九月三日

交內務財政司法農商各部會同核議具復此批

大總統
印

中華民國四年九月三日

國務卿徐世昌

大總統令內務財政司法農商四部呈爲會核察哈爾馬羊羣地方

擬設招墾設治局一案祈鈞鑒訓示文 五年一月十三日

政事堂奉批令准如所擬辦理卽由各該部轉行遵照此令

中華民國五年一月十三日

國務卿陸徵祥

都統呈

大總統爲援案設立太僕寺招墾設治局藉以推廣墾

殖保護人民各緣由呈乞訓示遵行文

(樂務總局承辦堂稿) 六年一月十八日

竊據察哈爾墾務總辦龍驤會辦胡商彝嚴汝誠呈稱本區所屬兩翼牧場佔地遼闊水草豐富土質肥沃溯自牧政廢弛以來附近民戶侵佔盜賣私墾日多徒以距縣寫遠治理無人國課既多損失良民亦不獲安堵自上年經前統率處奉命將該牧場劃歸本區交由本總局派員接辦當令兩翼總管劃清應放應留界址並繪圖咨報陸軍部查核立案數月以來清查已墾熟荒以三百六十弓折合一畝計算不下七八千頃若以二百四十弓折合一畝計算已達萬餘頃以上比照內省各縣轄境已備小

縣規模又查牧場以北正白一旗除已墾熟地業經劃歸沽源縣外其未墾生荒以三百六十弓一畝計算亦約有一萬數千餘頃棄利於地荒廢可惜查四年九月本總局請於商都地方設置招墾設治局並聲明他日開放大段生荒應卽援案辦理曾奉明令批准設立年餘荒地日闢戶口日增成效已著所有兩翼牧場已墾熟荒及正白旗未墾生荒亟應並作一區援案設立招墾設治局置局長一員所有辦事權限概照商都現行章程辦理一面清丈餘荒開放生荒推廣墾殖一面代理訴訟經徵錢糧籌設縣治實屬兩有裨益又查兩翼牧場在前清原歸太僕寺管轄亦名太僕寺馬廠擬請定名爲太僕招墾設治局仍候荒地墾成地租增益卽行改爲太僕縣現時經費卽由該處荒價項下墊支異日再由該處地畝收入項下歸還等情呈請呈咨前來中玉查察區地處蒙疆寒荒待闢方今綏邊政策自應以招墾與設治並行該總會辦等所請援案設立太僕

招墾設治局確係爲推廣墾務保護居民起見自應准其設局試辦一俟著有成效再行呈請改縣至該局長一職兼轄招墾設治事宜極爲重要查有前署多倫縣知事現充該處墾務局局長林茂亭勤懇耐勞堪以試署以資熟手除咨國務院內務部陸軍部財政部農商部查核並令該總會辦轉令繪具設治區域地圖註明四至約計方里暨擇定城基地點造具開辦常年各項經費概算書呈候咨部備案外理合具文呈乞鈞鑒訓示遵行再呈准商都設治原案定名墾務行局兼設治局現今改稱商都招墾設治局以歸一律合併陳明謹呈

大總統指令內務農商財政陸軍四部會核察哈爾都統田中玉呈

設太僕招墾設治局文

六年四月二日

命兼署內務總長范源濂

財政總長陳錦濤

陸軍總長段祺瑞

農商總長谷鍾秀

呈悉准如所擬辦理卽由各該部轉行察哈爾都統遵照此令

大總統
印

中華民國六年四月二日

國務總理
陸軍總長
段祺瑞

內務總長范源濂

財政總長陳錦濤

農商總長假

內務財政農商陸軍四部呈
大總統會核察哈爾都統請立太

僕招墾設治局一案文

竊承准國務院函稱奉
大總統發下察哈爾都統田中玉呈請設立

太僕招墾設治局文一件查此舉關係邊治亟宜詳加討論應請會同核議具覆等因並准該都統分咨到部查兩翼牧場熟荒暨正白旗生荒面積約有兩萬數千頃地當多倫張北之間東接沽源西趨興和爲商都招墾設治局之後盾地方遼闊墾殖方興以之併作一區援案設治拓地利而實邊方於邊治墾務均有裨益應卽准其試辦該局局長既經該都統遴派林茂亭試署自係爲地擇人應予照准以資籌辦惟兩翼牧場爲軍用牧場之一四年十二月曾經奉令責成該都統改良馬政分別孳養地點當於五年十月間准該都統咨稱兩翼牧場以劃清界址爲入手辦法凡已墾熟荒及餘荒夾荒不便放牧者清丈放墾其整段草荒未被佔墾者統留備牧畜以新定界限爲憑此次切實整頓總收入約五十萬元以純收入十分之九補助牧政十分之一充放墾及正白鑲白兩旗設治經費等語並檢圖咨送陸軍部在案此次設治既於牧政無礙自應查照前

案按圖劃界掘壕作誌永禁越墾倘有越界盜墾照律嚴懲所有收入以十分之九批解陸軍部辦理牧政十分之一撥充放墾及設治經費庶於兼籌並顧之中仍寓整飭進行之意至原請定名爲太僕招墾設治局一節查兩翼地址本統名太僕寺此次開放餘荒係一部分之事若以之命名誠恐墾務牧政名實相混應由該都統就設局地址妥定名稱咨明內務部核定以昭慎重此外所有開辦常年各經費概算及設治局地點所在並管轄區域地圖應由該都統迅行造送各主管部核奪又原請將商都墾務行局兼設治局改稱商都招墾設治局一節係爲劃一名稱起見應卽併予照准所有會核察哈爾都統請援案設治招墾擬請分別照准一案節經四部往返咨商意見相同理合會同呈請鑒核訓示施行謹呈墾務總局呈都統擬訂察哈爾設治放賣街基章程並照式乞鑒核

示遵文

六年一月十日

竊本區地處蒙荒草萊甫闢新近設治地方大都皆係官有土地開闢之初城市未立必先開放街基振興市面以期成爲蔚然繁盛之區現在沽源縣新遷地點商都招墾設治局業已成立將來兩翼牧場馬蓮灘等處亦擬設治所有街基均係官荒統歸官放既名街基自難適用普通放荒章程然使漫無限制一任自由處分售價過高則商民裹足不前有妨地方之發達售價過低則恐承辦人員從中屯留取巧殊不足以杜流弊而示整齊現由本總局擬訂察哈爾設治放賣街基簡明章程十條並承領街基執照格式一紙附呈鑒察如蒙核准卽請分咨內務財政農商三部立案並由本總局刷印執照暨簡明章程令發各該縣局遵照辦理是否有當理合具文呈請都統鑒核施行指令祇遵謹呈

察哈爾設治放賣街基章程

(承 第 街 基 執 照 式 附)

第一條 察哈爾所屬新闢各縣及設治局或墾務行局所有放賣街基

地皮悉應遵照本章程各條辦理

第二條 放賣街基以二百四十弓爲一畝分爲四等一等正街地基每畝定價若干元二等側街地基每畝定價若干元三等後街地基每畝定價若干元四等城角及背街偏僻之處每畝定價若干元應由各該縣知事設治局長體察情形規定價格呈由墾務總局核准令遵辦理

第三條 凡商民承領街基除按等繳納地價外應照章繳納丈費一成每照一張繳照費一元註冊費一角此外不得多收分釐

第四條 各縣街基由各該縣知事或設治局長照章放賣隨時呈報墾務總局轉呈都統公署查核備案

第五條 街基執照由墾務總局印刷呈由都統蓋印發給如需用時由各該縣或設治局暨墾務行局隨時備文呈請核發以便填用

第六條 商民承買街基每戶至多不得過二段每段長五十弓寬二十

弓按畝收價以杜屯留包攬之弊

第七條 商民承買街基不得向外國人轉賣及抵押並須取具確實保證書呈由該管知事局長查核立案

第八條 街基地價收入專備留充各該縣或設治局建築衙署及土城土壤之用但須先行呈請核准所有用款均應取具證憑單據呈報墾務總局核銷轉呈都統公署查核備案

第九條 放賣街基之一成丈費及執照費註冊費應由各縣知事局長隨時報解墾務總局核收不得移作他用

第十條 本章程自呈奉都統核准之日施行并由都統公署分咨內務財政農商各部立案

附承領街基執照式

都統令准內務部咨開據察哈爾墾務總局呈送設治放賣街基章

程並執照格式均屬妥適應准備案等因仰局知照文

二十六年二月十六日

案准內務部咨開准貴都統咨稱據察哈爾墾務總辦龍驤等呈送設治放賣街基簡明章程十條並執照格式請鑒察分咨立案等情查所擬章程執照格式均屬妥適自應准予辦理除指令分咨外相應咨送立案各等因到部查原章開放街基各條均屬允協且爲發達城治起見亦屬正當辦法自應准其備案除咨行財政部查照外相應咨覆查照等因准此合亟令仰該總局知照此令

墾務總局呈都統籌設商都招墾設治局應俟馬羣荒地丈竣再令

該局長吳恩溥到差任事文

四年九月八日

竊本總局現在開放大馬羣暨羊羣界內大段荒地當經議擇七台適中地點設立招墾設治局定名爲商都招墾設治局一則推廣墾殖興闢地

利一則代理訴訟保護居民以爲將來推設縣治之先導已經稟承前都
統呈明 大總統暨咨各部並請以現充張北縣墾務局長吳恩溥

試署商都招墾設治局局長並分令遵照各在案惟查大馬羣羊羣兩處

新荒地段遼闊勘丈需時羊羣現已丈竣布告招墾近來請領者頗屬踴

躍大馬羣一段荒域尤大近亦加班丈量分途並進惟因所有界限與該

羣總管原報界限廣狹多有不符當由本總局加委劉委員鳳林前往會

同該羣總管劃清界址並督同原派勘丈委員等趕緊丈量務早竣事是

設立商都招墾設治局現尙在籌備時期至成立時期應俟由部核議呈

奉 大總統批准行知到察再行設局以資治理再查張北一屬餘荒

夾荒甚多現正實行清丈該局長職務重要當此墾務吃緊之時自未便

遽易生手致碍進行所有籌設商都招墾設治局應請俟奉 大總統

批准並大馬羣全地丈竣後再由本總局呈請鈞署令知該員吳恩溥到

差任事現時仍令充任張北墾務局局長藉資熟手而策進行如荷允准
卽請批由本總局分行遵照是否有當理合備文呈請都統鑒核指令以
便令遵謹呈

墾務總局令張北墾務局局長設立商都招墾設治局候呈奉批准

後再行令遵到差茲錄部署原批令仰該知事局長遵照文

四年九月

十八日

案查擇定七台適中地點設立招墾設治局並揀員試署一案業經都統
何呈明 大總統並分別咨令各在案惟查大馬羣羊羣兩處新荒地
段遼闊雖經本總局派員加班丈量迄未竣事是商都招墾設治局之設
尙在籌備時間又張北一屬餘荒夾荒甚多現宜實行清丈該局長職務
重要自未便遽易生手致礙進行所有籌設商都招墾設治局應俟奉

大總統批准行知到察并大馬羣全地丈竣後再由本總局呈請都統

令知該員吳恩溥到差任事現時仍令充任張北墾務局局長藉資熟手而策進行當經本總局呈請都統鑒核令遵茲奉指令呈悉准如所擬辦理卽由該總局分行遵照此令等因奉此除分令外合亟抄錄令文令行該縣

墾務局局長事遵照此令

墾務總局咨審判處長興和道尹財政廳長擬訂商都招墾設治局辦事權限大綱咨請修改見覆並遵令自擬各項專章互咨立案

文 四年九月二十九日

案查本總局開放商都牧羣及羊羣大段荒地請於七台乾井梁地方設立商都招墾設治局揀員試署該局局長推廣墾殖保護商民一案業經都統呈奉 大總統批令交議並由都統轉咨財政內務農商司法部備案及分別令行貴廳貴道貴處遵照各在案所有該局局長辦事權限自應遵照原呈明白規定俾資遵守茲由本總局擬訂辦事權限大綱十

一條相應咨請貴處詳細查核如有應行修改之處請卽詳加修改見覆以便主稿會呈都統轉咨立案至該局關於墾務民政財政司法各項要務并請遵都統原令由道廳處局自擬各項專章互咨立案俟該局設立之日逕交該局局長遵照辦理望切施行實紉公誼除分咨外此咨商都招墾設治局辦事大綱十一條

第一條 於察哈爾七台乾井梁地方設立招墾設治局一所定名曰商都招墾設治局

第二條 招墾設治局以推廣墾殖保護商民籌備縣治爲宗旨

第三條 招墾設治局關防遵照呈大總統原文由察哈爾墾務總局刊發文曰商都招墾設治局之關防

第四條 招墾設治局局長援照縣知事兼理司法事務暫行條例及縣知事審理訴訟暫行章程代理所轄境內一切訴訟事宜

第五條 招墾設治局局長對於境內所駐巡防軍隊得有會同該管統領節制調遣之權

第六條 招墾設治局得於局內設置承審員及科長科員辦理應辦事務並得僱用錄事專司繕寫但須守定部核概算冊所定名額不得超過

第七條 招墾設治局局長遇有民政財政司法墾務各項要務應稟承興和道尹財政分廳廳長審判處處長墾務總局分別核示辦理遇有重大事件亦得逕呈察哈爾都統示遵

第八條 招墾設治局應用公程式對於都統陸軍第一師長多倫鎮守使墾務督辦總會辦興和道尹財政分廳廳長審判處處長用呈對於巡防統領各旗羣台站各縣知事各關局學校用咨

第九條 招墾設治局開辦及常年經費暫由察哈爾墾務總局墊撥遵

照部核概算數支給

第十條 招墾設治局局長應妥擬辦事詳細章程呈由墾務總局興和道尹財政分廳廳長審判處處長會同核定轉呈察哈爾都統立案遵照執行

第十一條 此項辦事大綱自呈請核准咨部立案之日施行

財政廳咨覆准咨商都設治大綱請主稿呈請轉咨至兼辦財政事宜俟成立後再行令遵文

四年十月三日

案准貴總辦咨送核擬商都招墾設治局辦事權限大綱十一條請即詳細核覆等因准此查擬訂大綱妥慎周詳應請貴總辦主稿呈請轉咨核示立案至該局應行兼辦財政事宜俟成立後再由敝廳核令遵照互咨立案合先咨會貴總辦請煩查照此咨

審判處函覆准咨設治辦事大綱各節請候呈奉司法部核覆再行

函覆文

四年十月十一日

案准貴局咨送核擬商都招墾設治局辦事權限大綱十一條請即修改見覆等因准此查大綱十一條籌畫周詳無任欽佩惟關於司法之專章須由本處草擬後呈奉司法部批准方能函達貴局茲准前因相應函覆貴局查照此致

興和道咨覆准咨商都招墾設治局辦事權限大綱商改第七條及

十一條開單請酌核文

(擬改條文附) 四年十一月三日

案准貴局咨開案查本總局開放商都牧羣及羊羣大段荒地請於七台乾井梁地方設立商都招墾設治局揀員試署該局局長推廣墾殖保護商民一案業經都統何呈奉 大總統批令交議並由都統何轉咨內務部財政部農商部司法部備案及分別令行貴道尹遵照各在案所有該局局長辦事權限自應遵照原呈明白規定俾資遵守茲由本總局擬

訂辦事權限大綱十一條相應咨請貴道尹詳細查核如有應行修改之處請卽修改見覆以便主稿會呈都統轉咨立案至該局關於墾務民政財政司法各項要務並請遵都統原令由道廳處局自擬各項專章互咨立案俟設局日逕交該局局長遵照執行望切施行實緝公誼除咨_{財政}審判_處外此咨附辦事權限大綱十一條等因准此敝道尹細核辦事大綱有條不紊權限分明惟第七條及第十一條愚見所及似有應行修正者相應擬具清單備文咨復貴總辦酌核是否同意希卽會銜呈請都統轉咨立案實緝公誼此咨

附擬改條文

第七條 招墾設治局局長遇有民政財政司法墾務各項要務應先辨性質隸何機關稟承興和道尹財政分廳審判處長墾務總局分別徑呈請示辦理如發生之案事實錯雜得於呈甲機關時並呈乙

丙等機關以便會議飭辦仍由主管之機關主稿會行遇有重大事件亦得徑呈都統示遵

第十一條 此項辦事大綱自部准立案之日施行其有未盡事宜及有修正之必要得會商妥協隨時呈候轉令遵行

墾務總局呈都統爲七臺木犢兔烏蘇及二號地兩村地點適中形

勢險要宜設招墾設治局乞鑒核文

五年二月十六日

查本區前據大馬羣總管報放馬羊羣西段大片官荒本總局爲推廣墾務保護居民起見擬於七台適中地方設立招墾設治局並請以張北墾務局局長吳恩溥試署該局局長一案業奉明令批准施行亟應遵照籌備但事屬創舉必須先行相度設局地點以立初基官先於民來者日衆且設局宜於遠邊不宜於附近蓋設治局遠則保護易週設治局近則範圍有限縣治構成之遲速地方之興廢戶口之多寡胥在乎此茲查七台

與八台鄰近地方之木犢兔烏蘇村及二號地村各地點形勢均尙適中
現有村莊各約長二三里許環村多山隨後建築公署營繕城郭取採山
石亦較便易若以招墾設治局設於該處則將來商民逐漸聚集人烟稠
密雖荒僻之山皆可變爲繁盛之地且與馬羊羣銜接控制既屬居中交
通亦稱便利除令知該局長吳恩溥親往勘察情形繪圖呈報到日再行
轉呈核奪外理合先行呈請都統鑒核備案謹呈

華務總局
財政分廳
審判處

和道會呈都統擬訂商都招墾設治局辦事權限大綱

請轉咨立案文

五年二月十九日

案查墾務總局開放商都牧羣及羊羣大段荒地請於七台地方設立商
都招墾設治局揀員試署該局局長推廣墾殖保護商民一案業經都統
呈奉批令交議並由財政內務司法農商四部會核呈奉明令批准各在
案所有該局局長辦事權限自應遵照原呈明白規定俾資遵守茲由墾

務總局擬訂權限大綱十一條咨行興和道尹財政分廳長審判處長詳細查核並由興和道尹將原擬條文修改咨覆除該局關於墾務民政財政司法各項要務由道廳處局遵前都統原令自擬各項專章另行呈請立案俟該局成立之日逕交該局局長遵照執行又所有設備及常年經費另由墾務總局編造概算呈請核定咨部查核外所有會擬該局局長辦事權限大綱十一條理合繕具條文會銜呈請都統鑒核備案並請轉咨財政內務司法農商四部立案施行再此文係由墾務總局主稿合併聲明謹呈

墾務總局令張北墾務局局長迅遵前令親往七台八台鄰近地方

勘察地勢繪圖呈覆以便轉呈文

五年二月二十七日

案查本總局爲七台與八台鄰近地方之木犢兔烏蘇村及二號地村各地點形勢均尙適中宜設招墾設治局令該局長親往勘察情形繪圖呈

覆候核一案當經呈請都統鑒核備案茲奉指令呈悉既據轉令該局長前往查勘應候查勘明確具報到局再行呈候核奪此令等因奉此合亟令仰該局長遵照本總局前令迅速親往該處實地勘察繪圖呈覆以便轉呈切切勿延此令

墾務總局令商都招墾設治局局長迅造各項概算表冊並將建築

費切實估計繪造圖冊以憑轉呈候核文

五年四月二日

照得本總局以商都招墾設治局業據該局局長擇定地點籌備開辦所有該局經常臨時支出各經費亟應事前規定俾有標準而便遵循業經呈請都統擬請比照三等縣缺開支并籌擬各辦法呈候核奪施行在案茲奉令開呈悉商都招墾設治局經費應准比照三等縣缺暫由該總局墾務收入項下墊支仰卽轉令該局長迅造各項概算表冊呈轉咨部立案并令將開辦建築各費切實估計繪造圖冊送署核辦此令等因奉此

除該局開辦經費候本總局酌核另文令遵外合亟抄發原呈令仰該局長遵照務須查照原呈各節切實遵辦迅將應需建築費若干切實估計繪造圖冊呈送本總局轉呈候核並將各項概算表冊在規定經常臨時各費範圍以內核實支配迅造送局以憑核轉咨部立案均毋違延切切此令

墾務總局令各縣

局知事

奉都統令准部咨奉批准察區設立招墾設

治局文

(原、呈附) 五年四月八日

案奉都署令開准內務司法財政農商部咨開本部等會呈遵核察哈爾馬羣羊羣地方擬設招墾設治局一案茲准政事堂抄奉批令准如所擬辦理卽由各該部轉行遵照此令等因奉此相應抄附原呈咨請遵照辦理等因准此合亟照抄原呈令行該局仰卽遵照辦理此令等因奉此除分咨暨通令外合亟抄附原呈令仰該局知事遵照此令

附原呈

竊准政事堂交察哈爾都統兼墾務督辦何宗蓮呈擬於現放馬羊羣地方建設招墾設治局奉批令交內務財政司法農商各部會同核議具復此批等因奉此當經總長等遵批會核該都統原呈所稱察哈爾商都地方距離縣治爲遠人民苦無保障自係實情所請選擇適中地點建設招墾設治局似可照准以廣墾殖其擬劃張北縣之四臺興和縣之五六七臺陶林縣之八臺並歸該局管轄亦尙可行改縣一節應俟將來辦有成效再行量情陳請核奪惟此項設治局旣爲設縣治過渡之制所有兼理訴訟各項辦法亦自應准照縣治知事兼理司法各項章程辦理其應需開辦暨常年經費應俟墾務總局造具各項概算表到部再行核辦所有遵批會核察哈爾馬羊羣地方擬設招墾設治局一案情形是否有當理合恭摺具陳伏乞鈞鑒訓示謹呈

墾務總局呈都統籌畫商都招墾設治局建築費額請鑒核示遵文

五年五月九日

竊據商都招墾設治局局長吳恩溥呈稱案查招墾設治局前奉鈞令赴七八臺調查地點遵卽出口擇定適中地點以白石山爲最宜繪具圖說呈送在案茲奉鈞令前據該局長呈明招墾設治局地點等情當由本總局令候呈請都統鑒核備案各在案茲奉都署指令呈暨附送圖說閱悉既據核定該局設治地點白石山較爲相宜並令妥速籌備進行應卽准予備案此令等因奉此合亟令仰該局長卽行遵照凡該局應行籌備事宜迅卽妥爲籌備以便進行勿得再行延緩此令等因奉此查設治地點業經勘定白石山理應繪具房圖呈請鑒核令遵再行招集商人庶可照式承攬投標估價職局方有把握至籌備事宜業經逐漸布置俟籌有端倪應由局長開具清摺另文呈請核定外擬合將建築商都設治衙署先

行繪圖呈送鑒核如果適用請將房圖隨令發局以憑招商投標實爲公便再監獄圖式先照實線建築以節經費圖內虛線隨時逐漸擴充合併聲明等情據此查該局長所擬設治局房及村設監獄規模宏富以外觀而論自應照圖建築以期堅固而壯觀瞻第此項鉅工非有五六萬現金不能蒞事以吾國之現勢及本區之財力曷勝支應且察區荒地遼闊現在正紅正黃各旗方將所轄荒地舉報放墾將來應行設治之處尙多此項建築開辦各費尤不能不預爲規定以爲標準而便遵行本總局籌維再四凡百建設開辦之始先宜收束局面俟日後收欸有着再圖逐漸擴張庶幾較易推行不致半途中輟此則總會辦所常用懍懍以爲戒者也此項設治局既爲縣治之過渡規模未便過狹署基自應劃留惟各項房屋現時毋庸普建暫擇其必要應用者先行建築以國幣五千二百元爲度附設監獄一所以國幣三千四百元爲度又附設營房一所以國幣一

千四百元爲度共需建築費國幣一萬元又開辦之時購置各項器具等費亦應酌定擬以國幣一千元爲度統由張北縣續催荒欠項下動撥如荷核准將來各旗各羣遇有設治之處有官房者應先儘官房居住如無官房統照此次規定建築費額辦理惟此項建築費額已達萬金應否另由鈞座委派專員前往監工抑或逕委該局長就近監工之處統乞令遵所有籌畫商都招墾設治局建築費額各緣由是否有當理合具文呈請鈞座鑒核示遵再商都招墾設治局常年經費已由本總局稟承前都統何酌定數目編入五年墾務出入概算呈部核定在案惟此項建築開辦費額委係特別重要支出不在此概算之內應請鈞座酌核咨部以憑立案而便報銷合併陳明謹呈

墾務總局呈都統擬於商都設治地方建築土城乞鑒核示遵文

五年

五月十三日

竊商都招墾設治局業經擇定乾井梁之十蘇木白石山地方建設局所
布置設治及墾務事宜已由本總局呈報鈞署並令知該局長遵照辦理
在案查口外地方荒僻平沙白壤散漫無垠兼之時有匪徒出沒當茲設
治之初欲圖居民麩集商賈薈萃必謀所以保衛之方爲長治久安之計
擬於該處週圍挖掘土壕就壕內挖出之土隨時就壕邊建築土城城壕
以外徧植楊柳各樹俾局所在商民叢聚既得有所範圍亦藉以資保
障地方發達縣治構成實基於是土城以內劃出街基以便分建鋪戶居
房振興市面所有地皮招集商民或租或售規定等則卽以此項收入充
作土城建築及修繕費用至土城週圍約七八里核計建築之費不過二
三千餘元尙易集事如蒙核准卽由本總局令行該局長遵照辦理所有
擬於商都設治地方挖壕建築土城緣由是否有當理合具文呈請都統
鑒核指令遵行謹呈

墾務總局指令商都招墾設治局呈請派員建築局署并監獄營房

文 五年六月十四日

呈悉此項工程已委任該局長爲監工正委員該局招墾科科長爲監工副委員分別令行在案仰卽招商投標核實估計三項建築費用總數不得超越一萬元以外並遵照本總局一千五百一十號令知暨都統指令迅速分造概算書三分補繪圖式二分以便分別存轉勿延此令

墾務總局令商都招墾設治局局長預估該局開辦及建築各費並

妥擬辦事細則呈候核奪文 五年四月十九日

前據該局長呈稱查明設治地點情形並繪具圖說前來當經本總局詳加審核以七八台間乾井梁之十蘇木白石山地勢適宜堪爲設治基礎業已指令遵照並呈報都署在案該局長應卽遵照前令從速出口籌備一切以期早日觀成所有該局開辦及建築各費究需若干亟應預爲核

實估計數目並繪具工程圖式尅日呈覆以憑核奪至該局辦事細則應由該局長參酌縣公署組織規則迅卽妥擬一併呈核以便分任職務各專責成合亟令仰該局長遵照辦理毋稍遷延貽誤要政切切此令

墾務總局令商都

招墾設治局局長吳恩溥

魏祖光

爲商都監工

正委員文

五年六月十八日

本總局籌畫商都設治局建築費額業經呈請都統鑒核令遵並令知遵照各在案查該局建築工程關係甚重無人監察難免偷工減料流弊滋多曷以期堅固而垂久遠亟應委派監工員以重要工茲委商都招墾設治局局長吳恩溥爲監工正委員商都招墾設治局招墾科科长魏祖光爲監工副委員除分令外合亟令委該員遵照公同認真監視督飭工匠妥爲建造毋令疏懈遷延時日致負委任切切此令

墾務總局呈都統據商都招墾設治局查明設治地點照繪原圖呈

請鑿核備案文

五年四月十七日

案查本總局呈請七台與八台鄰近地點適中形勢險要宜設招墾設治局令該局長吳恩溥親往勘察繪圖呈覆一案於本年二月二十二日奉鈞令呈悉既據令行該局長前往查勘應俟查勘明確具報到局再行呈候核奪此令等因在案茲據該局長吳恩溥呈稱案奉鈞令招墾設治局宜擇定七臺適中地點令行局長尅日親往該處實地察勘情形繪圖呈覆候核等因奉此局長奉令後卽於二月二十日帶同測繪員警汎等出口調查當時因積雪滿地茫無津涯地利形勢無憑相度兼以局長在馬上兩眼昏花失神仆跌身受微傷隨卽單騎回口調治六七日於三月二十三日復自出口詳加察勘自五六台起至七八台止到處相度或因地勢偏僻或因水無來源至離口之遠近民情之便利種種情形不得不先爲籌畫查有四五台間之公主城地處平原三面山水環繞地面寬闊距

口二百七十餘里距興和縣一百六十餘里距陶林縣二百餘里以此建設局所交通便利經費稍可節省人民樂於遷移商務可期發達此調查建設公主城之情形也伏查七八台間乾井梁之十蘇木白石山地勢較公主城稍嘉該處僻居西陲聞西北一帶經興和墾務局已丈過荒地三百餘頃均按下則招墾無人承領况距口三百餘里距興和縣一百八十餘里距陶林縣一百六十餘里核計道里遠近與公主城相差無幾目今該處人烟稀少雖地多膏腴須俟縣治建設後營房修造可爲西北一方保障人民有所依恃方可冀積戶成鄉積鄉成縣使荒涼邊鄙變爲繁盛之區此調查乾井梁白石山之情形也局長相度地勢與採訪輿論民情相同惟殖邊政策未能因惜小費而失地利誠如訓令所謂宜於邊遠不宜於附近局長查明兩處設治地點究以何處爲宜未敢擅專理合繪圖呈請總辦鑒核俯賜令遵以便籌備進行實爲公便等情前來查該局設

治地點宜擇適中之地以資策應不宜距口太近致誤遠圖轉使人民難
期便利據稱白石山較公主城地勢稍嘉於該局管轄區域亦屬適中該
局設治地點當以白石山較爲相宜除由本總局指令該局長遵照將應
行籌備事宜妥速籌備進行外理合照繪原圖呈請都統鑒核備案謹呈

墾務總局指令商都招墾設治局呈奉都統指令設治地點以白石

山較爲相宜准予備案文

五年五月一日

前據該局長呈報查明招墾設治局地點等情當由本總局呈請都統鑒
核備案各在案茲奉都統指令呈暨附送圖說閱悉既據核定該局設治
地點以白石山較爲相宜并令該局妥速籌備進行應即准予備案此令
等因奉此合亟令仰該局長即行遵照凡該局應行籌備事宜迅即妥爲
籌備以便進行勿得再行延緩此令

墾務總局呈都統開辦商都招墾設治局需欸孔殷應令張北縣知

事局長催足四年荒價以應要需乞鑒核令遵文

五年五月一日

查張北縣墾務局上年欠解荒價達八萬餘元之多迄今逾期已久尙未據如數呈解前來殊屬延宕現在商都招墾設治局業已擇定地點實行籌備卽日成立所有創造局署建築營房及開辦一切事宜在在需款擬定卽由張北縣墾務項下動支以資建設查該縣上年欠解荒價甚鉅尙未催齊不特前項經費無着殊碍設治進行卽按之明令批准考成條例該知事局長亦各有相當之處分况荒價爲國家收入正欸荒價不清則註冊升科無由入手辦理應由該縣知事局長迅將所有四年度欠解荒價八萬餘元限期一律催齊掃數報解不得再任玩延除分令該縣知事暨墾務局遵照外理合備文呈請都統鑒核嚴令該縣知事局長等迅速催繳掃數清解以應要需謹呈

墾務總局呈都統擬令商都招墾設治局清查各台未經升科地畝

卽由錢糧收入支給設治常年經費乞鑒核備案文

五年四月十八日

竊查四五六七八九各台向爲官地距離張北興和陶林各縣均極遙遠各該台所有地畝悉屬私墾盜賣卽或間有承糧之地一經清查其領地一二頃者實則墾熟不下三四十頃或多至五六十頃不等甚至有盜開至二三百頃者核計田畝應行升科爲數正復不少而張興陶各縣皆以鞭長莫及付諸不問不聞之列現在商都招墾設治局旣經開辦劃分各台地段就近管轄成立之初經費正虞無着不得不暫由墾務收入項下墊支如將各臺盜墾地畝核實清查勒令補行升科則國家田賦正供農民當然繳納卽由錢糧收入項下支給設治局常年經費已綽有餘裕以正項之收入作行政之經費亦屬正當辦法一舉而數善備除令行該局局長迅卽尅日清查造冊呈候核奪外理合備文呈請都統鑒核備案謹

呈

墾務總局呈都統擬定商都招墾設治局經費比照三等縣缺開支

各辦法乞鑒核令遵文

五年四月十一日

查商都招墾設治局係奉批令照准設治前由本總局令知該局長吳恩溥相擇地點籌備一切現據該局長報告已擇定七八台之間白石山地方建設治局並預備開辦各情曾經據情呈報在案所有該局經常臨時支出經費亟應事前規定俾有標準而資辦公該局既兼設治一切規模略與縣公署無異似應倣照縣公署辦理庶經費有着辦事不致竭蹶惟查黑龍江吉林各省設治局經費大都比照縣知事經費減半支給或視地方之大小事務之繁簡按七成八成支給不等本區爲督促設治進行起見事屬創辦既不得過事鋪張亦不能概從節省折中規定卽擬比照縣知事經費支給查察區縣知事缺分三等一等月支經費九百五十元二等月支經費七百五十元三等月支經費六百五十元其餘司法一切

經費均在其內察屬涼城陶林沽源三縣皆係三等縣缺現在新設之商都招墾設治局卽擬比照三等縣缺辦理每月准支經常臨時經費六百五十元局長一員規定月俸一百八十元附設招墾一科置科長一員月薪五十元由本總局委派稟承該局長辦理墾務開放及清丈事宜俟新荒放竣之日卽行裁撤其餘一切掾屬悉由該局長自行選用其辦公一切臨時支出應由該局長在此定額內支配動用不得超越範圍仍遵章編造各項概算表冊送局查核轉呈咨部立案以昭核實現當開辦伊始此項經費暫由墾務收入項下按月墊支俟該處四五六七八九各台餘荒夾荒清丈竣事則地租收入爲數亦必不少再由就地錢糧收入項下開支至開辦建築各費另令核實估計繪造圖冊送局轉呈核定辦理所有擬訂商都招墾設治局經費請比照三等縣缺辦理並擬定支給辦法各緣由是否有當理合備文呈請都統鑒核指令祇遵謹呈

墾務總局呈都統商都招墾設治局經常臨時各經費擬改由票銀

平餘項下開支乞鑒核准予更正文

五年五月九日

竊本總局擬訂商都招墾設治局經費比照三等縣缺辦理每月准支經常臨時總費六百五十元並聲明開辦伊始此項經費暫由墾務收入項下按月墊支俟該處四五六七八九各台餘荒夾荒清查事竣升科之後再由就地錢糧項下開支各等情業經呈奉都統指令照准轉行遵照在案現准財政分廳廳長面商以錢糧一項係屬國家正供未便擅予就地開支致涉混淆該設治局常年經常各費現時暫由墾務收入項下墊給將來地畝升科錢糧確有把握應卽由票銀平餘各項收入內開支萬一不敷或仿照陶林縣辦法另由區欸酌予補助或由墾欸墊給臨時再行請示辦理等因總辦等詳加酌核錢糧未便開支自係實在情形茲擬改由票銀平餘各項收入內支給并因不敷援案酌撥區欸補助既不致有

礙正供而該局經費亦籌有的欸似屬兩得其宜理合備文呈請鑒核准予更正指令祇遵謹呈

墾務總局令張北縣知事傳解張萬善等歸案訊辦文

五年五月八日

案據商都招墾設治局局長吳恩溥呈稱案查本年二月間局長遵令兩次出口帶同堪輿測繪員護警等勘明商都設治處所白石山地勢相宜將建築衙署土城卽以白石山爲地點繪具圖式呈蒙總辦批准備案旋派局長監工令速出口籌備進行等因嗣聞張北縣屬黃花腦包民人張萬善等在白石山附近領有地畝局長深慮該民人等未悉設治情形前在口上曾傳張萬善到局面諭遵照復經張北墾務局郭局長將張萬善原交地價酌量發還一千餘元迨後張萬善故意續領郭局長以該處係屬勘定設治地點未便照准復經切實駁阻在案局長更恐界限未明或起交涉祇得自籌墊欸多購木椿再行馳赴白石山督飭工役按照繪圖

原劃土城衙署各界分別排立木椿數百餘根俾就近地戶民人各有遵守統計三次出口勘劃設治地點一切費用及購置木椿共墊去洋九百餘元此卽張北墾務局任內虧欸之由來也局長現於七月四日到商都任事正擬籌備進行所有衙署營獄土城自應卽時趕緊建築庶免貽悞前日招商同赴原勘地點分別按圖估計以便尅日興工詎至該處所立木椿均已無存另挖壕塹詳細調查始知張萬善勾串伊村人王文元並客民高彭年等所爲該民人等私自拔棄木椿意圖侵佔漁利爲日後壟斷地步查職局設治地點前經明白曉諭又經郭局長再三駁阻張萬善早已知悉決無藉口之餘地此次膽敢抗違其平日不法行爲概可想見且白石山荒地甚廣該張萬善何以不領他處而必欲謀佔設治地點居心尤爲叵測况張萬善二次交過地價僅止五十餘頃似此任意影冒強佔官有財產實屬目無法紀若不按律從嚴懲辦將來勢必效尤隨卽派

差勒傳去後茲據該役以張萬善在張家口開有店舖與王文元均住口上隔境未便往傳現將高彭年送案前來訊據高彭年供伊係山西祁縣人堅稱伊聽張萬善等說及所領荒地確在大白石山並稱張萬善等亦知是處係設治地點至各界木椿是否張萬善等拔棄伊不知情等語供甚狡展惟查張萬善王文元均係張北縣民人而張萬善王文元現在寄住張家口自應據實陳明應請總辦轉令張北縣就近設法傳解歸案審辦以示懲儆除將高彭年暫行收押聽候質訊外理合具文呈請總辦鑒核俯賜轉令張北縣迅將張萬善王文元傳解歸案審辦實爲公便除逕呈道尹外伏乞照准施行等情前來查該民人等私自拔棄木椿意圖侵佔設治地點實屬干犯法紀合亟令仰該知事迅速將該民人張萬善王文元傳解歸案審辦仰卽遵照勿延此令

墾務總局令

商都招墾設治局長

會同查明張萬善呈稱各節詳

訊具復文 五年八月二十五日

案據張北縣教育分會長兼理勸學員張萬善呈稱竊緣高彭年王文元張萬理等於去年陰歷四年間具稟總局承領七台大白石山荒地當蒙准予交價承領因伊等務農無暇煩民代理但領空閒餘荒歸舉務局勘丈已令興和墾務局給予勘丈在案民等聞之卽往興和請求於十一月間業蒙興和墾務局前任郭局長派委郭王勞胡等四委員前往勘丈按照所領地段共丈一百餘頃當卽收領押荒銀兩已如數繳納今歲三月間郭局長將民等傳去聲言據吳局長云所領地內決定設立縣治命民等讓出地若干以備建設彼時民等喜出望外以爲設立縣治人民生命財產可資保護隨卽承認建築公署監獄城池用地若干全行報効然郭局長恐其不敷建設與民等退出押荒銀一千餘元命讓地三十餘頃民等因建設縣城爲保民起見亦卽承認毫無異言但退出三十餘頃之地

並未決定在何處所委因當時吳局長尙未擇定在何地點設治故此恐留南而要北留東而要西那時搗亂更爲不便無已隨與郭局長商明暫且靜候一俟吳局長擇定在何處設治卽與伊留何地點以上各情有卷可查並有郭局長可證除退讓外其餘地畝亦有部照可憑至分領各戶有賣舊地買新地者亦有購農器者屢屢持照威逼要地民無法對待與該局長交涉吳局長假詞爲公不指地點民現在無法解救之時不能伸冤之日近奉敝縣長票傳驚悉該局長控民等侵佔地畝殊屬詭異想此時能撥雲見天有照不能無地也且民等領地在去歲四月間商都設治在今歲以時而論侵佔何以在設治之前卽以今歲設治建築公署等地民等情願報効以報効數少卽行退讓此非空言有已交押荒銀兩可證並有福順生過付爲憑旣願報効或退讓侵佔何有可以證明至謂民平日不法行爲有何實迹私自拔棄木椿有何見證交價雖僅止五十餘頃

亦不能無地王文元高彭年實係領地本人因何謂爲勾通該局長至今含糊不決在何處設治並欲將民地全行奪佔究竟是何居心國家部照爲民信守今欲奪地國家有無信用官長有無信用是誠在不可思議之間國家設治原爲保民徵得地價賣給人民又欲收回不料轉而擾民如該局長出爾反爾恐誠信之國家卽誠信之官長必不出此如商都地方左近地畝出示一律收回民亦無詞可措然他人則仍耕種民地則必須收回何厚於彼而薄於民且伊於正當理由自知缺乏不得已誣民侵佔地畝當有實證斷非空言所可誣讎似此各情民等無知只得懇請總辦鑒核恩准派員調查以分皂白實感大德無旣矣等情查此案據前任商都招墾設治局局長吳恩溥呈請到局業經本總局據情轉令該張北縣知事傳解歸案審辦在案茲據該副會長張萬善呈稱各節除批示外合亟令仰該局長會同該縣知事查訊具覆此令

墾務總局指令商都招墾設治局呈送建築商都設治衙署房圖祈

鑒核令遵文

五年五月九日

呈悉查建築公署以足數辦公爲主要固不能概從簡陋亦不得過事鋪張核閱所送圖式規模宏敞徒壯觀瞻用費亦屬太鉅前由財政分廳所擬建築房屋一百七十間當奉都統批示核減在案該局長所擬圖式碍難照准仰候本總局詳加規定另文令遵圖二紙存此令

墾務總局令商都招墾設治局分造建築設治局概算書並圖式以

便分別存轉文

五年五月二十四日

案查本總局籌畫商都招墾設治局建築費額具文呈請都統鑒核示遵一案奉令呈暨圖式均悉查此項建築開辦等費既據該總局酌定數目一萬一千元尙屬核實應卽照准并著爲例嗣後遇有此項設治局之建築開辦費用均不得越此範圍卽轉令該局長遵照籌辦並分造概算

書二份補繪圖式一份呈轉到署再行咨部備案可也至該局建築監工人員關係重要仍責成該總局妥慎選派以資督察並報明本署仰即遵照此令等因奉此除分令外合亟抄錄原呈令仰該局長迅卽分造概算書三份補繪圖式二份以便由本總局分別存轉至監工人員仰候本總局妥慎選派另行令遵此令

墾務總局呈都統爲商都招墾設治局未報成立以前准月給該局

長津貼請鑒核備案文

五年五月二十四日

查商都招墾設治局常年經費經本總局核實預計比照三等縣缺每月准開支國幣六百五十元業經呈報都統核准備案並令行該局局長遵照在案惟前項經費應自該設治局呈報成立之日起方准動支該局長吳恩溥於交卸張北局務以後未經呈報設治局成立以前准月給該局長津貼洋八十元俾資辦公此外不得別有開支用杜濫費而重公帑除

令知該局遵照外理合具文呈請都統鑒核備案謹呈

墾務總局呈都統令發商都招墾設治局關防請鑒核備案文

五月年

二十七日

查本區設立商都招墾設治局應由本總局刊刻木質關防一顆文曰商都招墾設治局之關防業經前都統何呈奉明令批准並呈明請以前奉天候補同知現充察哈爾張北墾務局局長吳恩溥堪以試署商都招墾設治局局長各在案查該局長吳恩溥前充張北墾務局局長一差業經交卸該設治局應行籌備事宜亟待進行茲由本總局刊發木質關防一顆發交該局長吳恩溥敬謹啓用並令將啓用關防日期分別呈報備案除令發外理合呈報都統鑒核備案謹呈

墾務總局咨財政廳興和道審判處暨令各縣知事局長抄錄關於

商都招墾設治局地點經費暨建築費及擬築城壕各呈文並批

咨請查照備案文 五年五月二十八日

查籌設商都招墾設治局一案已由道廳處局會擬辦事權限大綱十一

條呈請都統鑒核轉咨大部查核立案在案該設治局局長吳恩溥業由

本敵總局令赴新任籌備成立所有該局設治地點以及常年經費並開支

辦法暨建築費額及擬築城壕等事宜經本敵總局先後籌擬呈請都統鑒

核均次第奉批照准施行在案除令知該局長遵照辦理并分別咨令外

相應抄錄原呈並批咨請貴道尹廳長處長查照備案可也此咨

都統布告商都設治區域人民已令左右翼巡防統領保護設治地

方文(總務總局承辦堂稿)五年五月三十一日

照得藍縷開疆邊氓賴以安集萑苻隱患地方要在防閑查本區於七台

以北地方建設商都招墾設治局前已呈奉大總統批准在案當經

令行駐在七台地方左翼巡防統領切實保護并令右翼巡防統領一體

遵照現在設治局業已開始建築設治在卽並於附近地方建築營房一所駐紮軍隊藉資保護以期綏靖地方俾商民視爲樂土除令知該統領等遵照切實保護外用特布告居民人等一體週知樂業安居集成縣邑經營草創市廛粗見規模防禦森嚴鄉野可期安堵是則本都統對於設治區域保護人民之宗旨也此布

墾務總局指令商都招墾設治局呈請令發六月份行政經費並送

憑單文

五年六月十一日

呈悉查該局常年經費比照三等縣缺每月准支六百五十元應自該局成立之日起支若在籌備時期只准月支局長津貼八十元俾資辦公業經呈報都統暨令知該局長遵照在案現在該局長並未趨赴所轄區域組織成局不得作爲該局成立之日經費一節原爲行政所需局尙未成何政之有當然不能卽行起支業於該局長呈報啓用關防日期文中明

白指令在案所請發給六月份經費之處應俟該局長確赴駐在地點將設治局所實行成立再行呈報具領計日核發至開辦經費一千元准於出口之日給領惟須樽節用途實用實銷仰卽遵照開辦費憑單存請領六月份行政司法經費憑單一紙發還此令

墾務總局指令商都招墾設治局據呈報商都招墾設治局成立日

期請鑒核文

五年六月十一日

呈悉啓用關防日期准予備案惟該局長應赴口外駐在所轄區域方可呈報成立照章支給經費現時駐口應作爲籌備時期至移交張北墾務局欸項文卷器具等項應俟各監盤委員暨新任郭局長查收呈報另案令知仰卽知照此令

墾務總局指令商都招墾設治局據呈繪送商都設治輿圖請鑒核

派員令縣覆勘劃界文

五年六月十八日

呈圖均悉查劃分區域爲設治要圖範圍過狹則不便設施疆域過寬則難以管轄度其地勢總以人民便利爲準繩據該局長周歷履勘按照原擬以張北所管之四台興和所管之五六七台陶林所管之八台暨新放大馬羣羊羣各地方劃爲商都一區詳閱地圖尙屬妥洽既據分呈仰候咨商興和道財政廳審判處會同核定另文分別令遵可也圖存此令

樂務總局興和道
財政分廳審判處

會呈都統遵令行縣會局劃分商都招墾設治局

管轄區域請轉咨備案文

五年六月二十九日

案據商都招墾設治局局長吳恩溥呈稱竊查前奉鈞局令開以奉前都統何呈奉明令批准創設商都招墾設治局等因並奉擬發辦事權限大綱條文刊發木質關防呈明令調局長主任局務當經報明成立日期暨先後勘定建置地點繪送衙署及監獄圖式呈請鈞局核示估計興建各在案惟查設治之辦事權限既蒙規定行知而轄治之區域範圍亟應劃

分訂界按原擬以張北縣所管之四台興和縣所管之五六七台陶林縣所管之八台連同新放大馬羣羊羣各地方一律劃歸商都另爲一區業經局長周歷履勘繪具商都轄境輿圖隨文附呈鈞鑒令行各該縣知事及馬羊羣總管遵照呈准原案一面遴派幹員會同復勘劃界則墾務之丈放行政之計畫與夫財政上之賦稅釐捐司法上之民刑訴訟俾得次第佈置逐漸進行庶幾邊地人民有所依恃以期仰副總辦惠澤邊黎保衛蒙疆之至意所有請委幹員勘劃商都縣界緣由擬合具文呈請鑒核俯賜遴員令委並請轉令各該縣暨馬羊羣總管遵照施行附送輿圖一紙等情前來據此正核辦間復奉都統令開該局長呈同前因令卽由道廳處局會同派員辦理等因奉此查該局長所送地圖並未開方計里四址界限都未明瞭果如所繪圖形辦理將來分疆劃界事實上必多窒礙查上年勘丈馬羊羣荒地時與正東之馬羊羣正西之正黃旗北之錫林

果勒盟西尼特王因邊界交涉曾由前都統何堂令各該王旗總管會同委員劃清界址並於當時挖壕立標以明界限呈明鈞署在案該商都招墾設治局與旗羣交界地點應卽以原有壕溝爲界庶幾有所根據是正北正東正西三面勿庸再劃至自西南迤正南之四五六七八各台應行劃入地面係由前都統呈准 大總統並咨部有案原分隸於張北興和陶林三縣應由各該縣知事與該局長會同商榷酌情形劃出若干分隸管轄務期彼疆爾界剖晰分明俾清權限而資治理除令各該縣局遵照辦理外合將劃分商都招墾設治局管轄區域緣由會銜呈請都統示遵仍候各縣局會同呈覆後再由道處廳局查核轉呈咨部立案合併聲明謹呈

財 墾
政 總
分 局
廳 與
審 判
處 和
道 會
呈 呈
都 統
請 令
張 北
興 和
陶 林
三 縣
務 將
各 台
以

南地段多行劃歸商都招墾設治局管轄文

五 年 七 月 十 三 日

竊商都招墾設治局管轄區域一案業由道尹總辦會商財政分廳審判處明定界限會銜呈報鈞署并分令該設治局暨張北興和陶林三縣知事會同商榷酌情形劃界分治各在案該設治局所轄之正北正東西三面與旗羣交界地點以原有壕溝爲界至明且顯自無庸議其自西南迤正南之四五六七八各台原分隸於張北興和陶林三縣距離各該縣治遠在二三百里以外近亦在百數十里以外管轄不易前已呈奉明令批准劃歸商都招墾設治局就近管理自應由各該縣酌量劃出俾隸管轄以清界限惟查張北興和兩縣幅幘皆甚遼闊陶林一縣其轄境雖較張興兩縣爲小然西與綏遠毗連未經開闢之地尙多若推而廣之不難與張興兩縣相埒現在商都設治伊始其管轄區域羣地爲多近雖漸次墾闢而荒蕪仍占多數人烟極爲稀少查四五六七八各台開闢較早煙戶亦漸繁盛然僅挨順台路直長一綫劃歸管理恐多糾葛若能於各

該台多爲劃出地段使隸該設治局管轄俾將台地人民得以逐漸移置羣地庶戶口易於增殖邊地易於發榮道尹總辦等爲開闢蒙疆督促設治進行起見應請都統令行張北興和陶林三縣知事察酌地勢務將各台以南地段多爲劃出使隸該設治局管轄仍由三縣會同商都招墾設治局局長出示曉諭境內人民一體遵照並將劃界分治情形會呈鈞署暨分報道署總局備查所有各該台劃出戶口錢糧各項冊籍卽由各該縣造册移交該局接收庶於設治前途較有裨益所擬是否有當理合會銜呈請都統鑒核施行再此呈係由墾務總局主稿合併聲明謹呈

墾務總局公函馬羣總管知照設治情形並請迅速劃界文

四年七月十九日

日

案查大馬羣荒段前經貴總管以印文呈請開放當經本總局稟呈前都統呈明 大總統派員勘丈建局設治並將貴總管咨部轉呈請獎各

在案乃延及半年尙未劃清界址耽延歲月坐耗國帑殊屬非是現奉都統令行該商都牧羣總管按照呈覆各節迅速分別遵辦並迅令會勘委員趕緊會勘可也仰卽知照此令等因奉此茲由本總局加派科員易薩圖爲劃界正委員馳赴羣地相應函致貴總管希卽遵照都統指令會同該委員易薩圖速將界址按照原圖妥爲劃清幸勿再事遷延致干部責再本總局沿界按號安插木標以作界址記號應請貴總管會同易委員曉諭界內蒙漢人等不准移拔如有私自移拔者以損壞公物論應卽依法嚴懲以重墾政除分令外此致

墾務總局指令商都招墾設治局呈報與興和縣訂期劃界請先派員下局會勘文

五年十月二日

呈悉該局長以劃界爲第一要義所見甚是呈請先期派員下局會勘等情既據逕呈仰候都統令遵可也此令

商都招墾設治局函請轉懇都統派員到局並轉令興和縣知事刻

日會同劃界文

五年十月二日

竊職局僻處七台經營草昧凡百待理應以劃界爲入手辦法前與興和高知事面訂九月底會同劃界業經呈報鑒核在案迄今高知事並未如期來局會勘不特局長辦理一切呼應不靈諸多掣肘且時屆冬防尤爲吃緊若不早分界線何以清權限而專責成用特稟懇總辦轉請都統迅賜派員到局並轉令興和高知事刻日會同劃界以便局長再與張北陶林兩縣次第會勘劃分庶於放荒行政防務等事宜俾可逐漸進行不勝翹企待命之至專肅敬頌助安

敬再稟者職局管轄地方前因兵力單弱恐誤邊防業將一切情形緘稟在案茲准巡防營留守李榮文面稱前奉丁分統調往滂江助剿盧匪之官兵五十員名刻已一律回防並據稱丁分統已奉大師電令暫

停出發本防亦甚吃緊著卽回防等因伏思職前稟請兵實爲邊防吃緊先事預防起見現在七台一帶出發之兵現已回防分布晝夜嚴加防範地方甚屬安靜堪紓慈廩用再據實稟明復請崇安

墾務總局令商都招墾設治局頒發馬羊兩羣地畝詳圖卽查照

界線管轄文

五年六月三十日

前據該局長呈送商都設治輿圖並請派員令縣復勘劃界等情業經指令在案並由本總局咨商興和道財政分廳審判處僉以商都轄境正西正北正東三面應以上年本總局勘丈馬羊羣荒地會同各該王旗總管劃清界址時所挖壕溝及樹立木標爲界至自西南迤正南之四五六七八各台應由張北興和陶林三縣知事與該局長會商斟酌情形劃界分治當會銜呈報都統並分令各該縣知事暨該局長遵照辦理在案茲將本總局勘丈馬羊兩羣地畝詳圖隨文令發仰卽查照商都招墾設治局

轄境正北正東正西三面界址卽以圖邊雙線爲斷可也再此圖應由該局飭發招墾科存查以後該科辦理放地事宜卽以此圖爲標準並卽知照切切此令

墾務總局令商都招墾設治局局長令委魏祖光充該局招墾科科

長文

五年六月三十日

照得商都招墾設治局招墾科科長一缺前經本總局令調涼城縣墾務局第二課課長沈範民補充嗣據涼局局長高承琳呈請留充原差藉資熟手而利進行等情業經本總局令准在案所有商都招墾設治局招墾科科長一缺亟應遴員補充以重職務茲查有魏祖光堪以委充是職薪水照章支給除令知該員遵照到差秉承該局長妥爲辦理招墾事宜外合亟令仰該局長知照切切此令

興和道道尹咨奉令劃界各節從速遵辦文

五年七月六日

本年七月四日奉都統令敝道尹會同貴局會呈遵令行縣會局劃分商都招墾設治局管轄區域乞鑒核轉咨備案一案奉令據呈已悉仰仍督令各該縣局從速劃分繪圖呈覆會轉以憑咨部立案此令等因奉此除分咨外相應抄錄令文咨會貴局請煩查照施行此咨

墾務總局呈都統爲發給商都招墾設治局開辦經費暨軍台恤銀

乞鑒核備案文

五年七月七日

竊商都招墾設治局開辦經費業由本總局估計規定給洋一千元並呈奉令准在案茲據該設治局長吳恩溥呈稱開辦需欸請將規定開辦費洋一千元如數發給以資應用並繕具印領前來業已照發由該局長如數領訖以資開辦又管理察罕托羅蓋軍台巴參領咨呈請給頭台已放地畝十二頃六畝遵章應給恤蒙銀合洋一百六十一元八角八分並繕具印領前來均經如數發訖所有發給商都招墾設治局開辦費暨察罕

托羅蓋軍台恤蒙銀緣由理合具文呈請鑒核備案謹呈

墾務總局令商都招墾設治局令發招墾科辦事大綱仰卽查照辦

理文

(辦事大綱附) 五年七月十二日

照得商都招墾設治局特設招墾一科置科長一員專理該管區域招墾及清丈事宜業由本總局規定呈明都署立案並委

魏祖光

充當科長暨

令行該局長知照在案所有招墾科辦事權限亟應規定俾資遵守茲擬訂辦事大綱九條連同開放生荒章程一本馬羣羊羣編號放荒地圖一本令發該科長魏祖光查收仰卽查照大綱規定各條秉承該局長妥爲辦理至圖中地號除馬羣全段歸該科放墾外其羊羣地畝自三百八十八號以上業由本總局開放雖有餘地而其中或已有人請領或與各大公司之地毗連尙在交涉之中仍應歸本總局辦理以期便利應自三百八十一號以下歸該科放墾但其中有五百零二號起至六百十二號止現

已有孝義堂報請押荒仍歸總局辦理此外則全數悉歸該科承辦徵收地價等項悉數解區除分令遵照外合亟檢同辦事大綱九條章程一本地圖一張令仰該_{科局}長即便遵照辦理可也此令

附商都招墾設治局招墾科辦事大綱九條

一商都招墾設治局招墾科科長秉承該管局長辦理該管區域招墾及清丈事宜

一上年大馬羣總管報放羊羣大馬羣地段協同總局劃界之地一律交商都招墾設治局遵章放墾

一前項羊羣大馬羣地段已經派員勘丈每五頃編爲一號每二十號安插木標記明號數沿界挖有壕溝並派撥地委員王械齡在段看守應由招墾科科長向王械齡同接收此後放地按號撥放毋庸再支丈費

一放羊羣馬羣生荒用本總局商字號部照專簿登記

一放羊羣馬羣生荒照本總局呈准章程以交款足額後方准給照承

墾不得以請領先後為憑致蹈貽穀時代內外串通屯留包攬之弊

一勘丈各台餘荒夾荒用都字號部照專簿登記但勘丈餘荒夾荒應

由設治局局長督令招墾科遵章妥慎秉公辦理准照本區勘丈章

程支給六釐丈費仍實報實銷有餘全數解區

已劃清後另由本總局令各縣將已放各台地畝清冊交設治局查核
以先應緩清丈但在未劃界以前復

一關於墾務應造各項表冊由商都招墾設治局局長督令招墾科遵

章辦理

一荒價火耗丈費照冊費等均係歸公正款全數載在部照應即全數

解區設治局不准截留分釐

一設治局經費由本總局另款發給

墾務總局指令商都招墾設治局呈請轉呈咨部添設郵政文

十五年七月

十五日

呈悉據稱呈請都統轉咨交通部迅令郵務總局派委妥員馳赴商都添設郵局實爲當務之急既據逕呈仰候都統令示可也此令

墾務總局興和道財政分廳會呈都統議覆商都建築土城在街基

租售各價未收入以前暫從緩議請鑒核示遵文

十五年七月十六日

案奉鈞署令開案查接管卷內據商都招墾設治局局長吳恩溥呈稱竊維城垣之設所以資保障非徒以壯觀瞻也故局長以爲市集繁盛之區人民比屋而居內容既充自無須乎保障是以近來各省會及商埠多有因地窄人稠將舊有城垣拆去者而商都則不然地處塞外遍地荒涼四通八達盜賊出沒無常地方時虞不靖今欲設治首先招集商民設法保

護俾可安堵無恐不致觀望不前若無城垣保衛居民盜賊何從防禦閭閻曷以安居是建築城垣實爲商都設治之必要惟財政奇窘節省宜先今擬因陋就簡築土城一座橫直以三里爲度四圍共十二里城身高二方丈寬一丈加以城堞並四門城樓暨週圍城壕規模略備聊以周垣藉資保障惟工程重要應選熟悉城工人員切實估計總使欸不虛糜工歸實際如蒙照准其欸應如何籌撥之處理合呈請鑒核示遵等情查此案前據該總局呈擬於商都設治地方建築土城藉資保衛並於土城以內劃出街基及各項市房居房所有地皮招集商民租售各價卽充作此項建築土城之費等情當經指令准如所擬辦理由該總局轉行該局長遵照籌辦在案茲該局長呈稱各節查與前該總局所陳略同惟此項建築經費在地皮租售各價未收入以前應如何先行設法籌墊以期設治基礎俾獲早觀厥成除指令呈悉仰候分令墾務總辦興和道尹財政分廳

廳長會同核議具覆再行令遵此令印發外合亟令仰該總辦迅卽遵照會同核議具覆以便令遵此令等因奉此遵卽會同核議查察區七縣均未建設城垣前次總會辦呈請擬在商都設治地方建築土城藉資保衛原爲設治基礎起見第商都一切設備應分別緩急逐漸進行建築土城一節前據該局長呈請到局業由總會辦指令呈悉查察區七縣均無城垣陶林且未建設衙署良以國家財政困難不得不暫行從緩商都係屬局所一切設備尤應逐漸進行不能驟臻完備所請建築土城之處應候本總局妥籌辦法另案令遵現時應卽出口組織設治局暫就該局長現修七臺官站房屋爲辦公地點組織告成再行遵照前令籌建正式公署至建築土城係設置以後之事應卽暫從緩議仰卽遵照既據逕呈仍候都統示遵此令等因在案道尹廳長均甚贊同擬請仍令該局長將該局組織成立先行籌建公署一俟將應放街基租售以後卽以租售之款充

作建築土城經費仍將租售支用情形呈報墾務總局查核用昭核實現在該設治區域街基地皮租售各價未收入以前欸既無著似應暫從緩議所有遵令議覆商都建築土城在該設治區域街基租售各價未收入以前暫行從緩緣由是否有當理合會銜呈請都統鑒核令遵再此呈係由墾務總局主稿合併聲明謹呈

墾務總局指令商都招墾設治局呈建築土城經費應如何籌撥文

五年六月二十四日

呈悉查察區七縣均無城垣陶林且未建設衙署良以國家財政困難不得不暫行從緩商都係屬局所一切設備尤應逐漸進行不能驟臻完備所請建築土城之處應候本總局妥籌辦法另案令遵現時應卽出口組織設治局暫就該局長現修七臺官站房屋爲辦公地點組織告成再行遵照前令籌建正式公署至建築土城係設署以後之事應卽暫從緩議

仰卽遵照既據逕呈仍候都統示遵此令

兩翼牧場清丈行局局長呈報前赴左翼劃界起程日期文

五月十八日

竊局長日前在口奉諭先與兩翼劃分內界並在口購製木標百餘桿以作標記等因奉此遵卽託人代購奈每桿價錢需用制錢三百文之譜又得僱車輸運局長以爲價值過昂兼且輸運不便故未在口購買茲於十四日回閃後特派周辦事員與該處民人商議用舊木簷改作木標每桿高四尺價值議定一百二十五文一桿不惟價值尙廉且省輸運之費茲購定二百桿局長於本月十八日帶同員書夫役僱車拉運木標前往左翼劃界以便隨時栽立而分界限所有局長帶同員書劃界日期緣由理合具文呈請鈞局鑒核備案施行謹呈

墾務總局指令商都招墾設治局呈請另行派員招商估計建築衙

署營獄文

五年七月十八日

呈悉查建築衙署營獄爲設治必要之工程創始經營勢難再緩口外天寒較早尤宜及時籌辦免誤要工該局長辦事素稱勇敢有爲應卽迅速妥籌辦理仍派該局長爲監工正委員以專責成仰仍遵照本總局疊次指令迅卽就欸招商核實估計並分造概算書補繪圖式呈送本總局查核分別存轉責任所在勿用推辭此令

商都招墾設治局呈請令撥建築衙署營獄經費並送憑單文

七年五月

二十四日

案查本年五月二十四日奉總局第一千五百十號令開案查本總局籌劃商都招墾設治局建築費額具文呈請都統鑒核示遵一案奉令開呈暨圖式均悉查此項建築開辦等費既據該總局酌定數目一萬一千元尙屬核實應卽照准辦理並著爲例嗣後遇有此項設治局之建築開辦

費用均不得越此範圍着卽轉令該局長遵照籌辦並分造概算書二份補繪圖式一份呈轉到署再行咨部備案可也至該局建築監工人員關係重要仍責成該總局妥慎選派以資督察並報明本署仰卽遵照此令等因奉此除令張北墾務局知照外合亟抄錄原呈令仰該局長迅卽分造概算書三份補繪圖式二份以便由本總局分別存轉至監工人員仰候本總局妥慎選派另行令遵此令等因奉此旋蒙總辦令委局長爲正監工委員各在案局長到商都任事後當卽招商核實估計嗣以諸事均須整頓監工一差勢難兼顧曾經呈請總辦另委妥員辦理本應靜候鈞令惟口外天氣與內地大不相同若遇八月卽難動工而現在所住之官房已不敷用招墾科業經成立員司人等更屬無從安置似此情形建築衙署營獄實爲當務之急局長職任所關無論如何爲難決不敢再從延緩致貽貽悞之咎現已邀集本地紳民妥籌辦法酌幫運料車輛及時建

築第興工伊邇購料僱工在在均須現款前蒙總辦呈請核准建築費額一萬一千元除前次職局領過開辦費洋一千元外所有建築費一萬元自應先行具領以便擇日興工理合備具領款憑單具文呈請總辦鑒核俯准照數令撥俾應要需而速進行再所有包工估計數目及各種圖式另文呈送鑒核合併聲明謹呈

墾務總局呈都統爲設治建築經費劃存本口中國交通銀行暨預

籌銀行資本呈報備案文

五年八月四日

查本區墾務元二三四各年收入不過萬餘元自上年六月墾務改組收入漸有起色而支應亦日見繁多自應分別緩急通籌辦理俾免偏枯查有前都統令准商都招墾設治局各項建築經費一萬元又本區現擬籌設勸業銀行振興實業補助實業疊奉都統面諭由各機關妥籌資本茲擬先行認籌資本五萬元連前項建築經費共六萬元現值中央令提解

欸蒙旗請領恤銀此項建築經費及籌認資本亟應專摺存儲本口銀行俾免牽動庶於設治及銀行前途兩有裨益至預籌銀行資本五萬元應候辦法擬妥屆時奉令提撥商都設治建築費應候該局長將估計圖冊報由總會辦等查核後再行令發合併陳明所有專摺劃存本口中國交通等銀行設治建築經費暨預籌銀行資本緣由理合呈報都統鑒核備案謹呈

舉務總局令商都招舉設治局將街基准令商人購買爲業體察情

形具覆核奪文

五年八月五日

照得該局駐在地點劃出街基原爲發展地方振興商務起見該局長所擬將街旁地基租給商民建築店房規定租額歲時繳納事雖屬於可行法究未臻妥善蓋地方初闢各商民遠道而來貿遷於此原期開創基業永垂不朽若此間街外地皮僅允租賃不准購買不動產所有權既未確

定而建築之費又須商民自出且年納租金永無了期恐均非商民所願轉於地方發達致生阻障仍不若將該處地基逕准商民購買爲業較爲妥善惟此項地基逼近街衢與尋常荒地不同價額自應大有區別應由該局長體察情形酌量規定總期公家與人民交相利益庶地方發達可期合亟令仰該局長遵照辦理仍將辦理情形具覆核奪此令

墾務總局呈都統爲墊發商都招墾設治局七八兩月經費呈請備

案文 五年八月二十日

查商都招墾設治局應用經費曾由前都統張令准查照三等縣缺辦法每月規定六百五十元暫由墾務收入項下按月墊撥呈請都統核准在案現在該局成立月餘所有七八兩月經費均經該局長先後具呈領訖計本總局墊撥之數係共銀幣一千三百元除令示存案備查外理合呈請都統鑒核備案謹呈

墾務總局呈都統據兩翼牧場清丈行局呈請左翼二十里鄂博迤

西地界可否劃分文

五年八月二十日

案據兩翼牧場清丈行局局長林茂亭呈稱案准左翼總管咨開查左翼正藍旗鬮馬羣鑲白旗自二十里鄂博至馬尼圖一帶現在分劃內界行將竣事惟查由二十里鄂博迤西之鑲黃旗大吉山至察汗齊魯台等處尙有民人歷年私墾之熟地約長有三四十里寬有三五里不等此等地界亦須劃界清丈爲此備文咨請貴局煩爲查照劃界清丈實爲公便此咨等因准此查該處之地局長以前在口同到都署會議時曾奉都統面諭令張北墾務局辦理查此地與職局現在所劃之界并不相連究竟是
否再由職局劃分理合具文呈請鑒核示遵等情查該處歷年私墾熟地
既在兩翼界內似應仍歸該局劃分遵章辦理以清權限除令該局遵照
外理合呈請都統鑒核備案謹呈

墾務總局令

商都招墾設治局局長

將張萬善呈稱各節會同查訊

具覆文

五年八月二十五日

案據張北縣教育分會副會長兼理勸學員張萬善呈稱竊緣高彭年王文元張萬里等於去年陰歷四月間具稟總局承領七台大白石荒地當蒙准予交價承領因伊等務農無暇煩民代理但承領空閑餘荒歸分局勘丈已令興和墾務局給予勘丈在案民等聞之卽往興和請求於十一月間業蒙興和墾務局前任郭局長派委郭王勞胡等四委員前往勘丈按照所領地段共丈一百餘頃當卽收領押荒銀兩業已如數繳納今歲三月間郭局長將民等傳去聲言據吳局長云所領地內決定設立縣治命民等讓出地若干以備建設彼時民等喜出望外以爲設立縣治人民生命財產尙得保護隨卽承認建築公署監獄城池用地若干全行報効然郭局長恐其不敷建設與民等退出押荒銀一千餘元命讓地三十餘

頃民等因建設縣城爲保民起見亦卽承認毫無異言但退出三十餘頃之地並未決定在何處所委因當時吳局長尙未擇定在何地點設治故此恐留南而要北留東而要西那時搗亂更爲不便無已隨與郭局長商明暫且靜候一俟吳局長擇定在何處設治卽與伊留何地點以上各情有卷可查並有郭局長可證除退讓外其餘地畝民有部照可憑至分領各戶有賣舊地買新地者亦有購農器者屢屢持照威逼要地民無法對待與該局長交涉吳局長假詞爲公不指地點民正在無法解救之時近奉縣長傳票驚悉該局長控民等侵佔地畝殊屬詫異想此時能撥雲見天有照不能無地也且民等領地在去歲四月間商都設治在今歲以時而論領地在前設治在後何得謂之侵佔卽以今歲設治建築公署等地民等情願報効以報効數少卽行退讓此非空言有已交押荒銀兩可證並有福順生過付爲憑既願報効並甘退讓侵佔何有可以證明至謂民

平日不法行爲有何實迹私自拔棄木椿有何見證交價雖僅止五十餘頃亦不能無地王文元高彭年實係領地本人因何謂爲勾通該局長至今含糊不決在何處設治並欲將民地全行奪佔究竟是何居心國家部照爲民信守今欲奪地國家有無信用官長有無信用是誠在不可思議之間國家設治原爲保民徵得地價賣給人民今又欲收回不料轉而擾民如該局長出爾反爾恐誠信之國家及誠信之官長必不出此如商都地方左近地畝出示一律收回民亦無詞可措然他人則仍耕種民地則必須收回何厚於彼而薄於民且伊於正當理由自知闕乏不得已誣民侵佔如侵佔地畝當有實證斷非空言所可誣讎似此各情民等無知只得懇請總辦鑒核恩准有無侵佔派員調查以分皂白實感大德無既矣等情查此案據前任商都招墾設治局局長吳恩溥呈請到局業經本總局據情轉令該張北縣知事傳集歸案審辦在案茲據該副會長張萬善

呈稱各節除批示外合亟令仰該局長會同該縣知事查訊具覆此令

陶林墾務局局長李塘呈請擬將馬蓮灘地方設立縣治兼辦墾務

援照商都辦法文

五年八月二十七日

竊塘前因解欸進口面聆都統訓示不以塘爲不肖諄諄以調查馬蓮灘地方民意人情劃歸豐陶兩縣何處爲宜並以設官便民之言相訓塘回陶時道經豐鎮與邊知事度春抵陶後與邊知事乃榮先後研究斯事大概邊蹇兩知事各有所見塘查馬蓮灘地方面積約有三四十方里民戶約有二三千家口未開生荒尙亦不少設再招徠墾戶則富庶有資自不難積以成縣且北距紅旗廟黑土坡正黃旗各蘇木不過四五十里之遙倘能由墾務項下籌措的欸設立馬蓮灘招墾設治局再將附近馬蓮灘之豐鎮興和陶林三縣邊鄙莊村劃入設治範圍當比較劃歸豐陶兩縣利便尤多且馬蓮灘人民主張劃歸陶林者以其地近陶林完納賦稅之

事較便然陶林保衛實力不足又隔離數十里最險惡之無底溝雖近亦遠其不便仍與歸豐鎮同主張劃歸豐鎮者以距豐鎮雖遠乃糶賣大宗糧石易於銷售卽用以納稅交易而退然馬蓮灘在豐鎮之北鄙距縣有二百數十里之遠盜賊充斥縱有賢良者以爲之宰亦實有鞭長莫及之患其不便仍與歸陶林同塘體察該處地勢民情無論歸豐歸陶皆有所不便者在其在察區敷衍政治時期歸豐鎮可卽歸陶林亦可原無研究之必要然當都統蒞任以後勵精圖治核實綜名皆能權衡至當與民更始似此種歸豐歸陶之舊說當然不成問題只設立一馬蓮灘招墾設治局足矣曾讀都統呈

大總統殖民實邊增闢縣邑文內開查該各旗荒場之大小地積大者俾令自成一區仿照上年呈准設立商都招墾設治局之成案設立某旗招墾設治局之語查馬蓮灘地方面積既大歸豐歸陶均有不便曷若劃地設治自成一區實行殖民實邊增闢縣邑之政

策矧馬蓮灘地方設治其利便者有三該處設治則必駐兵防守地方上盜賊之患可免無底溝險惡之路可平人民即可樂業安居其便利者一該處設治則增設局署人民之完納賦稅毫無闕隔其便利者二該處設治則扼豐陶二縣之要振興教育整飭警察能使人民之愚者智弱者強風俗漸臻於純正盜賊漸歸於澌滅其利便者三設再有賢能爲之宰通商惠工勸學獎業遠方之來者多近處之居者聚不三數年間卽當蔚然成一大縣馬蓮灘設治其便利者有三而其不便者無一焉塘再四思維附加研究洵無過於將馬蓮灘地方另設一治較爲適宜既可釋豐陶兩縣之爭又可爲增闢縣邑之漸再查馬蓮灘地方馬蓮草叢最多因以得名蓋馬蓮草者卽野蘭也如能劃區設治卽取名曰野蘭縣或文蘭縣既不失本來之義又可得文雅之名愚昧之見是否有當除逕呈都統外理合呈請總辦鑒核施行謹呈

舉務總局興和道財政分廳會委陶林縣知事陶樹猷前往馬蓮灘

調查設治有無窒礙文

五年九月十一日

案奉都統令開據陶林舉務局局長李塘呈請擬將馬蓮灘地方設立縣

治兼辦舉務等情據此查馬蓮灘地介陶林豐鎮之間業經令行該縣等

會勘劃界在案該員擬按照商都成案在該處添設治局兼辦舉務有無

窒礙合亟令仰該道會同妥議呈覆以憑核辦切切此令等因奉此查馬

蓮灘居豐陶之間其距豐鎮陶林二縣各若干里並與商都招舉設治局

距離若干里原呈均未切實指明且正黃正紅各旗荒地現正次第丈放

如將來設立設治局或設縣治時其地點於已放荒地各縣有無妨碍未

放荒地能否控制以上各節在在均關切要急宜派員前往該處詳細查

勘查該知事堪以委派合行會委仰即迅速起程前赴該處切實調查並

繪圖貼說從速具報以憑會議呈覆切切此令

墾務總局興和道財政分廳會呈都統議覆平地泉設治請鑒核文

五年十月七日

竊奉鈞令開案據陶林局長李塘呈稱擬將馬蓮灘設立縣治兼辦墾務等情合亟令仰該總局會同道廳妥議呈復以憑核辦等因奉此查馬蓮灘居豐陶之間其距豐鎮陶林二縣各若干里並與商都招墾設治局距離若干里原呈均未切實指明且正黃正紅各旗荒地現正次第丈放如將來設立設治局或設縣治時其地點於已放荒地各縣有無妨碍未放荒地能否控制在在均關切要當經會委候補知事陶樹猷前往該處切實調查去後茲據該員呈復知事遵於九月十八日由張起程道經豐鎮隆盛莊公溝黃羊灘貫紅馬蓮灘大土城火石壩平地泉等處詳勘地勢荒場訪詢紳董意見因紅旗廟一帶道途不靖未便前往遂於二十八日返豐與邊知事王科長會晤商及設治一事意見亦頗相同謹將調查情

形爲我憲台陳之查馬蓮灘劃歸陶林案懸兩載紳商紛紛聚訟迄未解決欲息數縣之爭便民利國並爲拓殖蒙疆鞏固邊防計畫最上之策無過設治請言其理馬蓮灘距陶林縣治九十里距豐鎮縣治一百七十里距涼城縣治一百四五十里距興和縣治一百四五十里距商都招墾設治局一百六七十里該處原歸豐鎮實係鞭長莫及距陶林雖近因無底溝險惡橫亘中間况陶北近接草地素爲盜匪出沒之藪若更劃馬蓮灘與陶則保衛實力愈難兼顧該處紳民除張銓等少數人民願歸陶林外其餘大戶鄉約等均持反對主義知事在馬蓮灘只住半日張琦張起武韓貴元及鄉約等聞知連夜趕程前來並有教士同行及抵該處知事已於是早赴火石壩當諭以劃界設治上臺自有權衡教士何能絲毫干涉此次調查已得實情返口呈覆必有正當辦法如實有陳說卽公舉代表三四人面商一切知事是日住平地泉以待當晚張琦張起武韓貴元并

張銓等六人同到咸稱不願劃歸陶林樂於設治雖加重擔負亦所至願卽向來主張劃歸陶林之張銓亦極贊成知事當卽溫語勸勉以靜待上臺命令無論劃歸陶林或改設治必以人民有益爲要旨并可不日解決各等語此該地設治對於人民方面實屬相宜之情形也馬蓮灘係正紅旗十十一蘇木之地開放雖久餘荒尙多而相距五十里紅旗廟之六七蘇木緊相連接全屬生荒已丈未放及已放之地共有三四千頃屯墾隊卽在其內往北則四子王部落東西蘇呢特達哩岡崖等處廣漠荒場難以枚舉往東北與興和商都接連之地則有陶林正黃旗十二三蘇木除少數民地外荒地亦復不少若於適中之地設治以劃四縣之地爲基礎勞來安集富庶可期以推廣正北墾務爲指歸殖民實邊尤多利賴一面講求保衛積極招民墾荒一面調查四子王附近與東西蘇呢特達哩岡崖荒地逐漸開放俟該設治局地多墾熟自立有餘卽可改局爲縣再

劃該縣之地設治仍以推廣墾務爲主不出數年北部蒙荒變爲沃壤不特設治局可以增加賦稅卽國家籌蒙政策亦可實地推行預爲改建行省之導綫此該處設治對於國家方面亦屬相宜之情形也該處設治既於人民國家均屬相宜似可無研究之餘地矣顧有三事尙須先決第一紅旗廟須常川駐騎兵一營第二設治地點及管轄區域須斟酌第三陶林瘠苦須兼顧統籌知事愚昧之見竊以馬蓮灘等處設治無論本區兵力若何單薄紅旗廟必須駐防不但可保墾戶之安全及屯墾隊之發達并可堵截草地內竄之土匪於右翼各縣治安極有莫大之關係否則設治而不能墾荒紅旗廟無底溝土匪仍舊充斥反不若仍歸豐鎮或歸陶林國家少一分支出人民輕一種負擔此對於紅旗廟駐兵之管見也今日之設治局卽將來改縣之先聲設治地點及管轄區域宜於創始之際妥爲規畫馬蓮灘距陶林九十里距豐鎮一百七十里無底溝近在咫尺

四山環繞村落零星設治實不相宜查張銓等原稟請劃之地內有距馬蓮灘五十里距平地泉四十里之公溝市鎮雖大然稍偏東設治亦不甚宜惟距馬蓮灘四十里之平地泉與原呈請劃之榆樹灣相距只五十里人煙稠密平原周圍二三十里距豐距陶道里相等距涼距興均各一百五十里距商都稍遠二三十里去年前道尹單出巡曾主張該地設治案經達部尙未奉准且京綏路由豐鎮至綏遠一段初次勘定路綫係直經平地泉後因外人條陳有改道岱海灘之議雖經測勘尙未確定平地泉在西四縣及商都招墾設治局之中以之設治實較馬蓮灘公溝爲宜卽可名爲平泉設治局改縣則名平泉縣若定該處設治豐綏路綫或因縣治關係仍舊經過亦未可知如慮無底溝險惡然相隔僅五十里可在馬蓮灘設一警區與駐防陸軍守望相助往北五十里又有紅旗廟之防軍互爲聲援亦足以保治安而戢匪勢至管轄區域東以原稟請劃興和之

九蘇木十一蘇木邊遠村落爲界南以豐鎮之第三區所屬爲界西以豐鎮之火石壩黑馬泉爲界北以四子王部落爲界紅旗廟以西歸陶林以東歸設治局此外悉仍其舊此對於設治地點及管轄區域之管見也陶林瘠苦衆所公認通年正賦僅五千餘元知事在任新籌附加警餉至一萬零七百元比較正賦超過幾及一倍查豐鎮通年正賦八九萬元而游擊隊兩營城警區警餉項合計不過八萬元兩兩相形所差太巨觸目傷心難安緘默故不憚再三呼籲爲民請命懇劃馬蓮灘等地以資補救案牘具存猶可復按卽今都統蒞任之始垂詢陶林情形知事兢兢以劃馬蓮灘爲請雖曰在陶言陶並無偏私成見此次奉令調查初意仍以劃歸陶林爲是及實地查勘證以多數官民意見事實公理相逼而來乃斷然拋棄從前主張贊同該地設治但迴顧陶林依然瘠苦劃地希望旣成畫餅又因紅旗廟六七兩蘇木荒多之故並將原歸陶林管轄之二十三

兩蘇木劃歸設治局是陶林欲益反損再四思維擬請將張銓等原稟請劃鑲紅旗之頭蘇木鑲藍旗之四六八蘇木及卓資山一帶之地劃歸陶林似此兼籌並顧陶困或可少蘇與平泉設治局及涼城縣尙無若何妨碍此對於兼顧陶林之管見也所有奉令查勘馬蓮灘等處情形是否有當謹繪草圖一紙除分呈外理合具文呈請鑒核伏乞訓示再此次調查時間短促於道里遠近界址廣狹僅只勘繪大略難免不無錯誤一俟設治議定應請派員詳細查勘以昭鄭重合併聲明附呈草圖前來驤等訂期會議按照該員所稱各節逐細研究以國家人民之利害相較則該地歸豐歸陶皆不若設治爲得計以地點之遠近距離相較則馬蓮灘設治又不若平地泉爲適中是該地急宜設治而設治地點宜在平地泉似無疑義再所稱紅旗廟必須駐兵管轄區域必須斟酌陶林瘠苦必須兼顧等語應俟設治計畫確定之後再行分別辦理惟設治必須經費臨時經

常歲計需洋一萬元上下其警察等費尙不在內緣汝誠筭理庫帑入不敷出歷年預算虧至二萬餘元之鉅况張北縣移治建築爲臨時費用既尙無處支撥若再議籌平地泉設治必需經常支欸委實無法措置究應如何籌計仍懇鈞座訓示藉便進行所有遵議馬蓮灘設治不如平地泉便利各緣由除草圖詢據該員業經逕呈毋庸再送外理合會呈鈞核令遵再此案係由興和道道尹主稿合併聲明謹呈

墾務總局指令兩翼牧場清丈行局局長呈請公出劃界日期文

年五

九月五日

呈悉仰卽遵照都統所圈界線認真劃分勿再含混致干未便此令

墾務總局令商都招墾設治局發給該局放墾撥地發照簡明辦法

仰卽認真辦理文

(放墾撥地發照簡明辦法附) 五年九月十日

照得事貴敏捷不取緩延此世界之通例也矧放墾一端直接與民戶交

涉信用攸關手續宜取乎簡單執行尤忌乎濡滯現在商都甫經設治各公司民戶聞風遠來具呈本總局請向大馬羣羊羣暨七台八台等處地方領墾荒地者絡繹不絕足徵風氣漸開墾務日有起色本總局對於領地各呈詞隨到隨批並隨時轉令該局辦理一方爲該局擴張範圍一方對人民顧全信用茲擬定關於人民具呈本總局請領該設治局轄境內荒地撥地發照簡明辦法五條令行該局着卽查明切實辦理該局長辦事勤敏夙爲本總會辦所深悉尙其勉旃毋負委任該局開辦三月之久現已直接放地若干收欸若干應卽具報收到欸項着卽隨時呈解以重公欸現在本區開辦銀行須撥墾務鉅欸以爲官股該局設治經費亦需墾欸開支放地收欸極不容緩且設治之有無成效視墾務之興衰爲轉移該局之冠以招墾設治局卽本此意該局長對於墾務應辦事宜務須積極進行認真辦理所屬職員如有才不稱職及辦理迂緩情事無論其

爲本總局所委派抑由該局長自行委任均准隨時撤換呈報核奪以重要公而免貽誤切切此令

附放墾撥地發照簡明辦法

一設治局遇有總局令行核辦之件應卽遵照辦理並隨時將所有辦法情形呈覆核奪

一民戶爲圖利便起見每向總局呈請承領設治局轄境以內之地或已交欸或未交欸總局於受呈後核明情節一面批示一面卽將原呈原批轉令設治局遵照辦理

一領荒在四十頃以上而又有確實保證人爲之保證請求分子三年繳清地價者此項承墾證書由總局填發凡民戶領地如係羊羣大馬羣大段荒地已繳押欸由總局核明准其分期清價者卽由總局令知設治局先行撥地設治局於撥地後卽將已撥某戶第若干號

某則地若干詳細開列地價清單呈報總局以憑填給承墾證書如
民人領地在四十頃以上又有確實保證人爲之保證逕行在該局
請求分期繳價者亦准該局長查明確實收繳四成地價呈由總局
填發承墾證書發交該局轉交收執

一部照均由設治局填發凡有民戶向總局具呈請領設治局轄境內
荒地或已交款或未交款先由總局核明批示一面令知該局如款
已交清卽於令文內聲叙明白但由設治局發照撥地其所交地價
作爲設治局解款設治局於造報本月計算書時卽將該款列入收
入計算如未交款亦於令文內聲叙明白卽由設治局收清地價然
後發照以免錯訛而清界限如民人逕在設治局請領荒地者亦准
參照上項辦法辦理

一凡總局令行辦理事件無論關於撥地及關於發照設治局均應於

奉文之日立即照辦勿任民人久候坐耗旅費事貴敏捷乃全信用至遲不得逾五日後呈覆

墾務總局呈都統據兩翼牧場清丈行局呈請移住太僕寺馬政公

署懇請撥兵保護文

五年九月十日

案據兩翼牧場清丈行局局長林茂亭呈稱竊職局原定設在太僕寺局長因爲該處週圍距民村太遠且無軍隊保護郵電不通往來公事亦多不便前曾呈請改設在閃電河馬政局內業蒙俯允令知在案惟閃電河奉都統面諭設立模範牧廠房間不敷應用着巡防第六營移住民房並着職局卽行修蓋土房以資居住局長曾將蓋房困難情形並擬租賃民房呈請鈞局鑒核惟據職局員司來函聲稱本局所需之房不過十餘間尙可將就租賃但與軍隊同居一村房屋實不易尋覓等情據此查租賃民房既屬不易修蓋土房亦復困難躊躇至再莫如仍遵定章移住太僕

寺馬政公署之內查該署房屋共有四十餘間空閑多年無人居住若移居此本屬應用有餘但四面草地人煙俱稀未免時虞危險如能撥往軍隊同居一處不惟職局得有保護卽軍隊亦可少租民房以省公款誠屬兩便所有職局擬移設太僕寺並請撥兵保護各緣由可否之處理合具文呈請鑒核示遵等情據此查該局長擬將局所移設太僕寺衙署本係原定地點自可照准惟據稱該處四面皆係草地人煙稀少未免時形危險須賴軍隊保護自係實在情形曾由軍務處長而呈奉令准予酌撥兵隊保護在案擬請都統令行巡防分統酌撥兵隊一棚駐紮太僕寺與該行局同居一處藉資保護而免疎虞是否有當理合具文呈請都統鑒核施行指令祇遵謹呈

墾務總局指令兩翼牧場清丈行局呈請擬租民房懇祈撥兵保護

文

五年九月十日

呈悉已據情面懇都統諭令于分統酌撥防兵一棚隨同該局常川駐紮以資保護至太僕寺本係原駐地點仰卽遷移可也前據呈請租賃民房一節應卽取銷仰該局一併遵照此令

商都招墾設治局呈報該局與興和縣訂期劃界請先期派員會勘

文

五年九月十五日

案奉都統指令據擬請令張北興和陶林等縣妥商劃界暨加派營兵二十名駐守該局等情已悉仰候令行各該縣會同該局長查照原案迅速劃分並將擬定劃界開辦日期先行具報以便派員會勘其添兵駐防一節已訓令巡防營丁分統就近酌量加派矣此令等因奉此局長奉令調署商都招墾設治局局長遵於九月一日到任接受關防將局內應辦一切次第整頓惟地方荒僻呼應不靈草昧初開百端待舉自以劃界爲第一要義查原案叙明新放大馬羣羊羣並四五六七八臺統歸商都管轄

東至馬羣中界西至蘇尼特南至三臺北至九臺職局駐在七臺地點應先由興和劃界以清權限而保治安局長因於九月十一日馳赴興和會晤高知事商酌劃界並接洽吳前局長交代事件適高知事有要公須赴豐鎮辦理當與局長面訂九月底親來職局查照原案會同親勘俾定界址並監盤吳前局長交代事宜會銜呈報茲奉前因除分咨張北陶林兩縣訂期劃界外所有興和縣與職局面訂劃界日期理合呈請總辦鑒核可否特請先期派員下局會勘實爲公便再職局已經防營丁分統加派營兵二十名駐紮保護合併呈明除呈報都統外謹呈

墾務總局令兩翼牧場清丈行局奉都署令已令右翼巡防分統照

撥兵丁移駐太僕寺藉資保護文

五年九月十五日

查前據該行局呈請擬將該局移回太僕寺原定地點並懇轉請令撥軍隊一棚以資保護一案當經據情轉呈並指令遵照在案茲奉都署第二

十號指令開呈悉已令右翼巡防分統照撥兵丁移駐察仰卽轉行知照可也此令等因奉此合再錄批令行該局卽便知照此

墾務總局呈都統兩翼牧場清丈行局移駐太僕寺牌樓暨交還馬

政局器具請鑒核文

五年十月七日

案據兩翼牧場清丈行局局長林茂亭呈稱竊職局擬請遷移太僕寺立局呈奉總局第二千零六十號指令內開呈悉已據情面懇都統諭令于分統酌撥防兵一棚隨同該局常川駐紮藉資保護矣至太僕寺本係原駐地點仰卽遷移可也前據呈請租賃民房應卽取銷仰卽知照等因奉此職局遵於九月十八二十等日一律移居太僕寺所有以前借用馬政局木器已經如數留閃照章點交監場處收訖所有職局遷移日期暨交還馬政局木器緣由理合具文呈請總局鑒核施行等情理合轉呈都統鑒核備案謹呈

墾務總局令商都招墾設治局將丈放街基地畝輕減價格以廣招

徠呈候核奪文

五年十月七日

照得爲政之道首在因勢利導隨時制宜庶幾政策進行俾人民得受幸福此理至明查該局設治伊始百端待理而於召集人民踴躍投資俾得整理市政經營商業由草昧而進於繁榮以樹縣治之基礎尤爲當務之急宜如何誘掖獎勵使人民欣然就範早獲安居以收實效現聞該局丈放街基地畝每畝有擬價銀二十兩之多以致人民聞風趨避裹足不前市面不早振興設治局等於虛設荒壤仍舊入境無人殊於設治進行實多窒礙該設治局長職務所在責任攸關長此因循曷克濟事爲此令知該局長卽於文到之日將丈放街基地畝擬定適當辦法從速減輕價格呈候核奪並咨商鄰縣會銜布告俾衆週知以昭信用而廣招徠是爲至要仰卽遵照此令

兩翼牧場清丈行局呈地僻荒野兵力單弱擬請添募局勇以資保

護文

五年十月八日

竊職局移住太僕寺馬政公署日期業經呈報在案惟查馬政公署房院寬闊四圍荒野附近數十里一民村巡防第六營撥歸目兵一棚計共十二名內除伙夫一名再隨同勘丈員赴地保護四名僅剩六七名該目兵等自隨局以來雖日夜巡防而草地廣漠土匪出沒無常萬一有匪前來如此幾名何能禦敵復以職局丈放收欸徒有虛名不得不嚴加防衛屢懇局長呈請添兵以厚兵力稍壯聲援等情局長覆查此係實在情形且爲迅速添兵之必要茲擬請添募局勇十六名並請領快槍十六桿每夜分班巡守以資保護惟所添局勇本爲保守職局起見擬盡用步勇每名每月工食洋八元較比馬勇可省三分之一外張聲勢內節餉需公欸既不致虛糜而兵士亦因之膽壯庶盜匪聞風遠去以免職局有意外之虞

所有擬請添募局勇緣由是否有當理合具文呈請總辦鑒核令示祇遵
謹呈

墾務總局令商都招墾設治局迅將丈放街基地畝遵照所分等則

查復核辦文

五年十月十二日

查該局街基地畝亟宜開放以便安集人民經營商業樹設治之基礎前
經令行遵照在案茲風聞該局丈放街基地畝有爲民人張萬善高壽山
所包買每畝索價二十元以致商民裹足不前之說查前清辦墾弊端百
出如局員屯留棍徒販賣久爲世所詬病該局長到任伊始自應痛除積
弊力求改良俾圖發展乃竟沿襲前清辦墾惡習長地販包賣之風卽足
啓局員屯留之漸如果屬實殊爲非是茲本總局擬將該局丈放街基地
畝略分四等一等正街地基每畝定價洋十二元二等側街地基每畝定
價洋九元三等後街地基每畝定價洋六元四等城角地基及背街低窪

之處每畝定價洋四元俾人民便於購買庶足以廣招徠樂業安居地方乃有起色爲此令仰該局長體查情形遵照所分等級從速確切查明繪具詳細圖說呈候核准令知照辦不得任令一人包賣故抬地價致阻設治進行仰卽遵照此令

墾務總局令商都招墾設治局令發馬羣地段表十八册文

五年十二月二十

日

查羊羣大馬羣兩羣業經劃歸商都管轄所有荒地應歸該局開放所有羊羣地段表册等件前已令交該局招墾科長魏祖光查收辦理在案茲將馬羣地段表十八册抄錄完竣合行令發該局查收存檔俾資根據仰卽點收具覆可也此令

墾務總局指令兩翼

總收場清丈行局管

會呈遵令會同另行改劃界限

繪圖具覆文

五年十月十九日

呈悉業由本總局呈請都統咨部備案矣仰卽知照並轉咨該總管等知照可也圖存此令

兩翼牧場清丈行局呈遵令調查正白旗地勢繪圖並請鑒核文

年五

十月二十七日

竊奉總辦諭令現擬就該廠劃留界內設立設治局惟須將正白鑲白二旗之中劃撥一旗地畝歸併設治但二旗之中何旗最宜應體查情形據實呈覆以備採擇等因奉此伏查鑲白旗與職局內較遠併入諸多不便至正白旗正與職局毗連局長回局卽派勘丈員李端清前往勘查去後茲據該員報稱竊員奉派赴正白旗調查地勢遵於本月二十日起程次日至麻呢圖由清丈邊界往北查至大白山南北約十五六里由都魯格山至西山子東西約二十七八里週圍查看地勢面積約千餘頃生熟皆是上地已開成熟者約四分之一再西山子迤西亦屬正白旗地雖與清

丈大山溝連界查詢係黑牛羣借站長約九十里寬四十里地性極好惟因聞已屬黑牛羣站住故未前往調查又探查大白山以外正白旗之地約尚有千餘頃生荒因盡屬草地無一民戶未便往查茲將調查大概情形繪圖報告等情前來理合具文照繪一圖呈請鑒核施行謹呈

兩翼牧場清丈行局呈爲查覆籌款設治整頓牧政各節文

一五年三月三十日

案奉總局第二千二百三十七號訓令內開案奉都署第十八號訓令案據蒙旗科科長麟岱前候補知事陳元呈爲籌款設治整頓牧政以固邊隅而通風氣呈請鑒核事竊麟等奉公赴錫經太僕寺境哈辣根台察勘土地肥腴有一萬餘頃且天氣和煖以之開墾設治准可籌的款二百萬元之譜較商都過之無不及也籌鉅款於荒廢之地設縣治於邊塞之區固衛邊隅開通風氣爲國家計萬世之利爲察區籌進行之款法莫善於

此者也惟查此地係前太僕寺左右翼馬廠歸陸軍部所轄而在前次都統劃界以外之荒地現在有官馬千餘百匹畜養需地無多北去草地寬闊大可推廣移地畜牧有此鉅款並可添購馬匹整頓牧政再於適中之區度地建設縣治人民得有依附商務藉以繁盛應名太僕縣以資控制既助牧政又利通行誠一舉而數善備焉素仰都統籌畫邊防整頓牧政不遺餘力麟等既有一得之愚何敢默而不言惟思事實與利權相對待利權大者事必稍難若徒畏其難則事必不辦而籌度有方則事無不舉細思此事之關係在牧養陸軍部兩翼之馬北地寬廣移地既可畜牧有此鉅款牧政又可整頓非惟無害且可添購馬匹同此草地荒廠一轉移之力既不悞牧養且可籌數百萬元之鉅款則財用足而百廢俱舉矣如蒙允爲可行謹當再擬章程呈請鑒核等情據此合亟令仰該總辦遵照妥爲審查是否可行具報核奪此令等因奉此合亟令仰該局長查核該

地是否可行有無設治之必要據實呈覆以便轉呈核奪切切勿延此令等因奉此查哈辣根台者係左右兩翼牧場之總名稱也除已劃歸職局清丈外尚有荒地萬餘頃若一統放墾定作上則註冊所進欸項實有二百萬元上下該處距口較諸各旗羣皆近週圍均有民戶毗連地戶承領自然爭先恐後較比各處開放容易多多進欸亦不至遲延地既放墾卽應建設縣治民人得有依從也但兩翼蒙人在該處居住數百年故土難離若令北移畜牧恐不認可且該場牧者每藉陸軍部爲推辭勢難辦到如都統以殖邊爲國計民生之急務似應預商於陸軍部痛陳利弊若部允可宗旨決定該蒙人不惟無所藉詞推諉亦不敢執意反對矣所有遵令查覆緣由是否之處理合具文呈請總局鑒核施行謹呈

墾務總局指令兩翼牧場清丈行局據呈查覆籌欸設治整頓牧政

各節請鑒核文

五年十一月十六日

呈悉業由本總局呈覆都統鑒核施行矣此令

墾務總局呈都統據兩翼牧場清丈行局呈覆麟岱等籌欸設治整

頓收政一案請鑒核施行文

五年十一月十七日

案奉鈞署訓令內開案據蒙旗科科長麟岱前候補知事陳元呈稱竊麟等奉公前赴錫盟經太僕寺境察勘哈辣根台地方約有一萬餘頃土地肥腴天氣和煖以之開墾設治准可籌的欸二百萬元之譜較商都過之無不及也籌鉅欸於荒廢之地設縣治於邊塞之區固衛邊隅開通風氣爲國家計萬世之利爲察區籌進行之欸法莫善於此也惟查此地係前太僕寺左右翼馬廠歸陸軍部所轄而在前次都統劃界以外之荒地現在有官馬千餘匹畜養需地無多北去草地寬闊大可推廣如移地畜牧有此鉅欸並可添購馬匹整頓收政再於適中之區度地建設縣治人民得有依附商務藉以振興應名太僕縣以資控制既助收政又利進行誠

一舉而數善備焉素仰都統籌畫邊防整頓牧政不遺餘力麟等既有一得之愚何敢緘默不言惟思事實與利權相對待利權大者事必稍難若徒畏其難則事必不辦而籌度有方則事無不舉細思此事之關係在牧養陸軍部兩翼之馬北地寬廣移地畜牧既無碍於牧政而墾務收入之欸甚多並可添購馬匹以爲整頓牧政之用同此草地荒廢一轉移間可籌數百萬元之鉅欸則財用足而百廢俱舉如蒙允行謹當再擬章程呈請鑒核等情據此合亟令仰該總辦遵照妥爲審查是否可行具報核奪此令等因奉此當由本總局令行兩翼牧場清丈行局局長林茂亭遵照妥爲審查據實呈覆去後茲據該局長呈稱查哈辣根台者係左右兩翼牧場之總名稱也除已劃歸職局清丈外尙有荒地萬餘頃若一同放墾定作上則註冊所進欸項實有二百萬元上下該處距口較諸各旗羣皆近週圍均有民戶毗連地戶承領自然爭先比較各處開放易著成效進

款亦不至遲延地既放墾卽應建設縣治民人得所依從誠屬善策但兩翼蒙人在該處居住已閱數百年故土難離若令北移畜牧恐未必易於認可且該廠所牧者係陸軍部之馬該蒙人動以陸軍部爲推詞一時勢難辦到如都統以殖邊爲國計民生之急務應請痛陳利弊咨商陸軍部俟奉部咨核准宗旨決定然後擇地遷移推廣牧政該蒙人不惟無所藉詞推諉亦不敢執意反對此審查該地之實在情形也理合據實呈覆等情前來查核該局長呈覆各節尙屬實情惟事關開放牧廠極爲重要究應如何辦理本總局未便擅擬理合呈覆都統鑒核令遵謹呈

都署令據陶林墾務局局長李塘呈稱區劃馬蓮灘設治區域敬陳管見等情仰局會核呈復文

五年十一月二十九日

案據陶林墾務局局長李塘呈稱馬蓮灘地方氣候溫和地勢平坦山陵環抱河水清漪得歸化城之形勢有張家口之氣概地關民富物阜財豐

北有奔化公溝兩鎮南有平地泉一堡而附近之散小村莊何止百處且平地泉係交通部指定之豐綏路線將來自能繁昌馬蓮灘地居適中設治問題洵爲確當不移之舉現以未設治之故該處資爲盜藪三五成羣十數結隊擄人劫車日有所聞良懦者去強梁者存棄地遺民莫此爲甚假若設治之議有成不如卽早爲之所以慰民望茲草擬該處設治區域概略以爲設治之第二步趨塘以當馬蓮灘之治域東南宜劃入興和之黃屯營東北宜劃入正紅旗九十兩蘇木正北宜劃至阿歸廟大山正南宜劃至可烏蘇山豐鎮隆盛莊大海西南宜劃至正紅旗八蘇木山正西宜劃至涼城桌子山又以無底溝之中間與陶林分界似此治域之區劃或五六十里七八十里百里之距離居中宰治再有賢有司以爲之宰蔚成大縣當在指顧間矣所有區劃馬蓮灘治域敬陳管見緣由是否有當理合備文呈請鑒核等情據此除指令外合亟令仰該局按照來呈是

否可行有無窒礙會同合議呈復以憑核辦此令

墾務總局令兩翼牧場清丈行局派員繪錄詳細全圖送局核閱文

五年十二月十日

案查該局丈放地段應連同正白旗所轄地方建立招墾設治局業由本總局令行該局查覆在案合再令仰該局長派員將兩翼牧場現放之荒段並連同正白旗全段繪錄大概全圖並約計方里送局核閱以便籌備進行仰卽遵照此令

墾務總局函興和道財政分廳奉都統令據李塘呈稱劃界各節似

應轉令各該縣議復再行會議請先核議見復文

五年十二月十四日

案奉都統訓令據陶林墾務局局長李塘呈稱馬蓮灘設治區域東南宜劃入興和之黃毛營東北宜劃入正黃旗九十兩蘇木正北宜劃至阿歸廟大山正南宜劃至可可烏素山豐鎮隆盛莊大海西南宜劃至正紅旗

八蘇木山正西宜劃至涼城桌子山又以無底溝之中間與陶林分界等情令按照來呈是否可行有無窒碍會同合議呈復以憑核辦此令等因奉此查馬蓮灘設治一案前據候補知事陶樹猷查覆業由貴道署主稿會同呈復在案茲據該局長所稱各節除各旗蘇木荒地歸敝總局管轄者如在應劃界內儘可劃歸所擬設治局管理外其他各處有無窒碍似應轉令各該縣核議具復再行合議呈復可否之處除分函

與財政分廳並道

尹長外相應函請貴

道尹

核議見復實紉公誼此致

墾務總局令張北縣知事據商都招墾設治局查覆高彭年承領荒

地在商都未設治以前並無侵佔仰該知事查照釋放文

六年四月一日

案查前商都招墾設治局局長吳恩溥呈稱黃花腦包民人張萬善勾串伊村人王文元並客民高彭年拔棄木椿意圖侵佔漁利請轉令張北縣傳解歸案審辦一案當由本總局轉令該知事遵照嗣據張萬善呈訴爲

藉公欲吞民地反誣侵佔懇請派員調查以分皂白等情復由本總局令行新任商都招墾設治局局長郭成鈞會同該知事查訊具覆各在案茲據該商都招墾設治局局長郭成鈞呈稱遵查七台大白石前荒地係民國四年十一月局長在興和差次奉鈞局令知當卽派勘丈員王志范勞本泉等隨同原稟請勘之高彭年王文元張萬理等前往勘丈大白石前荒地一段面積一百四十三頃七十六畝八分淨地九十六頃九十五畝註明領地戶興業堂字樣並於五年春間在興和墾務局呈繳押荒銀兩領有興字號部照十張計中地二十八頃下地三十一頃嗣據王文元等續繳銀元一千七百餘元適局長風聞該處擬設縣治當將荒銀發還在案奉令前因局長於九月一日到差查局內存有二尺餘長細木樁五根想卽吳前局長購置之樁隨往大白石前勘驗毫無排立木樁形跡附近亦無居民無從查訊卷查吳前局長原呈僅叙排立木樁數百餘根並無

確實數目究竟排立木椿若干根確係何人拔棄有無當場目擊人証且拔椿數百根棄置何地吳前局長均未逐一聲明正核辦間接據張北縣教育分會副會長張萬善及民人高壽山王占魁卽王文元張萬理自行投案詢據張萬善面稱伊充張北縣教育分會副會長兼理勸學員從未遠離會所况吳前局長到商都後伊未來商都地方試問何有勾串拔椿情事至王占元等請丈給領大白石前荒地係在去年冬間若商都設治則在本年夏日以時而論其非侵佔自明且該地伊未領有一畝是實並詢據高彭年等僉稱伊等上年承領大白石前荒地九十餘頃現在願將建設縣治地點讓出僅將領照之地五十九頃耕種管業各等語均尙近情局長當經督同招墾科長魏祖光勘丈員郭蘭先將城基劃出並將城外酌留三百六十弓以備建築市廛等項公用一面將公地外之毛地一段丈得七十九頃零八畝除去蘗草城灘台道砂石河渠等不堪耕種外

淨地五十九頃如數撥給該民等具領查照原領部照管業完案所有遵令查明高彭年等承領大白石前荒地係在商都未設治以前現已讓出築城地點並無侵佔緣由理合據實呈覆鈞局鑒核指令祇遵再吳前局長呈稱張萬善平日不法行爲概可想見一節查張萬善係張北縣教育分會副會長兼理勸學員如有不法行爲何以公舉辦理學務究竟該副會長有無不法實據曾否被人指控應請令由張北縣就近查明呈覆局長距口三百餘里無從調查合併聲明等情前來查此案既據查明高彭年等承領大白石前荒地係在商都未設治以前現已讓出築城地點並無侵佔拔棄木椿亦無實據應將該民人等釋放完案除指令外合亟令仰該知事查照此令

墾務總局指令商都招墾設治局據呈將城基分爲四等酌定價洋

等情准予備案文

六年一月六日

據呈遵令將城基分爲四等酌定價洋等情應准備案至丈放城內街基價洋留作地方修署築城之用事屬可行惟應由該局將丈放街基價銀隨時呈報備查不得任意開支並候另案呈請都統鑒核再行轉令遵照圖說二紙存查此令

舉務總局指令商都招舉設治局呈請令准興和縣酌撥警察來商

協同保衛地方文

六年一月十八日

呈悉據稱請暫發鋼子步鎗四十支馬鎗二十支以便編練警察並請令興和縣酌撥警察二三十名來商協同保衛地方等情該局長爲保衛商民起見既據逕呈仰候都統令遵可也此令

舉務總局指令陶林縣知事商都招舉設治局局長暨委員等據呈

會同勘劃商陶界址文

六年一月十九日

呈悉查設治伊始必須界限劃清然後著手進行庶官民均資便利茲據

該縣局委員等呈稱會同勘明八台土城子西山嘴南北大道一條與陶林十二蘇木交界又由大道折向東南以八台山南分水與十二蘇木分界十二蘇木東界與旗租地及十蘇木山嘴毗連十蘇木東南與九蘇木半個蘇木七台交界雖離陶林縣治一百八十餘里劃歸商都以便就近管轄等情應准如呈備案所有十蘇木界內慶豐清瑞兩莊已經墾熟升科之地本年錢糧等項准歸陶林經征仰將該兩莊錢糧紅冊咨交商都自民國六年起卽由商都接續征收以清界限既據逕呈仍候都統令遵圖存此令

都統令商都與張北興和陶林三縣劃界一案惟興和不無異議仰卽會同道廳處核議具復文（呈文部咨附）六年一月二十一日

案查商都招墾設治局與張興陶三縣劃界一案前經令委陶知事樹猷會同勘劃去後茲據各該縣局呈覆到署查張北陶林兩縣均稱遵令劃

撥惟興和一縣不無異議其興和商都之界究應如何劃分合亟照抄各原呈暨草圖並興和縣公民郝成等原稟與部咨等件令行該局仰卽會同興和道尹財政分廳審判處迅速核議具復以憑分別咨復令遵此令附商都招墾設治局呈爲與張北興和陶林三縣劃界情形文

案奉內務司法財政農商部會核察哈爾馬羊羣地方擬設招墾設治局一案原呈商都地方距離縣治寫遠人民苦無保障自係實情擬劃張北縣之四台與興和縣之五六七台陶林縣之八台並歸商都管轄亦尙可行等因轉行遵照嗣奉墾務總辦興和道尹財政分廳會呈商都設治伊始其管轄區域羣地爲多人煙極爲稀罕查四五六七八台開闢較早煙戶亦漸繁盛然僅挨順台路窄長一線管理恐多糾葛請令張北興和陶林三縣知事察酌地勢務將各台以南地段多爲劃出使隸商都管轄俾得將各台民逐漸移置羣地蒙疆易於發榮督促設

治進行等因業奉都統批准分行各縣一體遵照矣吳前局長未及劃界辭職局長奉令調署商都深知七台八台毗連十蘇木等處皆係崇山峻嶺爲土匪出沒之區原包括半個蘇木在內分隸興和陶林二縣均離縣一百七八十里似應劃歸商都擬請檄知三縣宜照原案會劃奉令行知各縣遵照各在案十一月間奉令陶委員樹猷到局會勘當經函知陶林縣蹇知事會同勘劃適陶林冬防吃緊蹇知事未便遠離派委一科科員董福赴商會同陶委員及局長勘得商都八台土城子西山嘴南北大道一條西與陶林十二蘇木交界又由大道折向東南以八台山分水與十二蘇木交界十二蘇木東界與旗租地及十蘇木山嘴毗連十蘇木東南與九蘇木半個蘇木交界距離陶林縣治一百八十餘里應將十蘇木劃歸管轄已由陶林代表董福繪具圖說商由蹇知事酌定另文會呈備案惟據陶委員面稱陶林瘠苦恐十蘇木所

屬慶豐清瑞兩莊劃歸商都與陶林警餉不無妨礙擬將該莊警餉隨後由商代徵歸陶以免陶林爲難局長極表贊成以昭公允此辦理陶林劃界之實在情形也查興和屬之半個蘇木與商都甘井樑接壤僅八九里該蘇木界內棹子山前向爲匪首趙有祿盤踞餘黨甚衆自巡防左翼丁分統帶兵痛勦趙匪甫經遠竄據巡防第三營營長李榮文面稱棹子山至烏蘭大壩一帶趙匪餘黨懼於軍威匿跡銷聲近頗安靜現既設治自應就近鎮懾以免故態復萌附近民人遇有刑事民事各案赴商訴訟不過二三十里隨到隨審易於了結卽繳納押荒錢糧等項亦可朝往暮歸若赴興和則距離一百六十里殊與民人不便所有興商劃界一事王知事到任未久不克分身派委警佐王璽前來會同陶委員與局長親歷踏勘其應劃之羊羣馬羣及五六七各台如照各部議案辦理自易解決惟半個蘇木當會議時未經察酌地勢以致

議案漏未載入該警佐不敢擅專局長查牛個蘇木地勢應歸商都實爲治匪理民起見如興和以警餉爲慮局長願照直省成案將牛個蘇木歲徵警餉若干悉數代徵解歸興和如此則於興和警餉並無妨礙於商都鄰近可保治安洵屬兩有裨益業經陶委員函達一切交由王警佐回興商酌此籌商興和劃界之實在情形也局長復於十一月下旬緘約張北代表胡汎官萬清會同局長與陶委員親勘羊羣各牌之地與張北蘇計良交界又四台大壩東界與張北西牛羣毗連又自榆樹溝沿古力半諾向北係屬西馬羣界址張北居該諾東南商都在該諾西北界限天然查四台羊羣及西馬羣照案應劃歸商都俟與高知事會商妥協擬在四台適中地方先籌警察三四十名藉資保衛行見遠方商賈聞風興起皆願出於其塗則商都墾殖繁興版圖日臻拓展此籌畫張北劃界之實在情形也查商都馬羊羣自光緒二十八九年

放給民墾迄今十有餘年拖欠押荒甚鉅錢糧亦未升科皆由距縣遼遠考察不周所致上年發生設治將馬羊羣並四五六七八各台劃爲一區不特新放地所可以清釐升科卽荒遠蒙疆亦可逐漸推展休養生聚羣地發榮不難另劃區域愈推愈廣以副都統展拓邊陲設治綏民之德意局長此次擬劃十蘇木半個蘇木雖原案未曾議及無如設治伊始限於山川形勢與民人大有關係未便含糊劃分致令後來遺憾惟念陶林地方瘠苦興和劃地較多當將兩蘇木歲入警餉悉數代徵仍歸各縣以重警務而資辦公所有局長會同委員暨各縣代表勸劃緣由是否有當理合開摺呈請訓示祇遵謹呈

附商都招墾設治局局長陶林縣知事等呈會同劃界文

竊知事乃榮奉都統訓令開據商都招墾設治局局長郭成鈞呈稱竊局長以樺櫟庸材仰蒙培植調署商都招墾設治局開辦伊始百端待

理查商都地點自四台起至九台止係由張北興和陶林三縣分出吳前局長到差未久卽經辭職尙未劃定界址所有交界地方權限不清凡遇命盜一切案件礙難著手且七台八台毗連十蘇木等處皆係崇山峻嶺爲土匪出沒之區分隸興和陶林兩縣均離縣一百數十里大有鞭長莫及之勢似應劃歸商都就近鎮懾擬請憲檄三縣迅速會同局長查照原案妥商劃界以專責成等情前來查該局長所稱各節係爲督促設治進行起見除分令張北興和遵照劃分外合亟令仰該縣迅卽遵照會同該局長查照原案妥商劃分以清界址而資治理並將擬定劃界開辦日期先行具報以便派員會勘此令等因奉此知事乃榮因冬防吃緊未便遠離派委一科科員董福警察第二所長麻師曾前往商都代劃適委員樹猷先奉令同前因由興和馳抵商都會晤局長成鈞妥商劃界事宜於十一月二十三日會同勘劃由大白石到十

蘇木喇嘛版石及八台旗租地小住二十四日委員樹猷等會勘得八台土城子西山嘴南北大道一條與陶林十二蘇木交界又由大道折向東南以八台山南分水與十二蘇木分界十二蘇木東界與旗租地及十蘇木山嘴毗連十蘇木東南與九蘇木半個蘇木七台交界距離陶林縣治一百八十餘里民人苦無保障自應劃歸商都以便就近鎮懾奉令前因除再會銜出示曉諭外所有委員樹猷等會同勘劃十蘇木等界緣由理合繪圖呈請都統俯賜鑒核指令祇遵再十蘇木界內慶豐清瑞兩莊已經墾熟升科之地共四十餘頃本年錢糧等項仍歸陶林經徵俟民國六年分再由商都接續徵收合併呈明謹呈

附張北縣知事呈遵令劃撥商都地點文

案奉鈞署令開案查該縣與商都劃界一案當經令派陶委員會同勘劃去後迄今兩月有餘該知事尙未呈覆事關設治進行未便懸案以

待合亟令仰該知事迅將該縣地面劃出若干尅日繪圖呈覆以憑核奪切切勿違此令等因奉此遵查此案前奉令知早經知事派委所屬中汛警備隊連長胡萬清前赴商都會同郭局長勘劃嗣復會商陶委員三面議定當將職縣原管之四臺等處地方劃撥商都招墾設治局管轄現正查造升科頃畝糧戶冊籍以便咨交各在案緣案關劃撥疆域界限自應由商都招墾設治局主稿三面會銜並繪具圖說呈請核辦方合完全手續是以職縣未便逕呈轉致藉口茲奉前因除俟會稿到日再行會銜繪圖呈報外擬合將遵令劃撥商都地點先行繪畫草圖一紙呈復都統鑒核施行謹呈

附興和縣天興等莊公民郝成等呈商都劃界不得任意割越文

竊民等所居之天興等莊向歸興和縣管轄風土人情均經習慣自七台成立商都設治局以來近聞郭局長有擬將天興等莊並劃歸商都

之說聞悉之下殊深徬徨此等浮言自不足輕於聽信然恐演成事實則民等有諸凡不便者請先爲我都統縷晰陳之伏思商都設治之本旨純爲推廣墾務開闢蒙疆起見是以原案內僅擬將五六七台劃歸該設治局管轄此外並無任意割取各縣熟地明文業經前都統何呈奉批交內務司法財政農商四部會議照准案卷具在豈可違反不但此也卽就利害上而言亦有不便者數端查人民幸福以治安爲要義年來土匪竊發滋擾閭閻若非興和巡警實力保衛民間幾無甯日萬一劃歸商都則甫經設治之區警察未能完善無可諱言處其保護範圍之下安枕與否勢難逆料此其不利於民等者一人民生計全賴交通民等糶糧購貨莫不以柴溝堡爲指歸道出興和藉便完納田賦若劃歸商都則往返增添一二百里之遙勞民傷財損失甚大此其不利於民等者二社會相處訴訟在所難免倘遇訟事到城親友之家既可

借住房舍交易之鋪復可通挪旅費若劃歸商都奔走寫遠固不待言則事事亦無所憑藉此其不利於民等者三以上各端係就大概而言其餘一舉一動均受莫大影響何若相安無事之爲愈也夫箕風畢雨小民之愛憎不同酌理斟情上憲之權衡悉當今以萬民安危所繫生計攸關既有所聞實難緘默爲此不揣冒昧聯名籲懇伏請都統鑒核俯順輿情嚴令商都遵照各部議准原案辦理不得任意割割俾民等不致流離失所感戴深恩曷其有極除逕呈興和縣知事外爲此公懇伏乞垂鑒施行謹呈

附興和縣知事呈據公民郝成等呈請願隸興和等情請令遵文

案據職縣天興莊公民郝成等新民莊公民李文海等謙瑞莊公民蕭建達等益安莊公民薛選等亨和莊公民盧明等呈稱爲萬民請願仍隸興和共懇鴻慈維持舊慣事竊公民等所居之大興等莊向歸興和

縣管轄風土人情均經習慣自七台成立商都設治局以來近聞郭局長有擬將天興等莊劃歸商都之說聞悉之下殊深徬徨此等傳言固不能輕於聽信然恐一旦演成事實則於公民等有莫大障礙不得不先爲我縣長縷晰陳之伏查商都設治之本旨原爲推廣墾務開闢蒙疆起見是以原案內僅擬將五六七台劃歸該設治局管轄此外並無任其割取各縣熟地之明文業經前都憲何呈奉批交內務財政司法農商四部會議呈准有案案卷具在豈可違反不但此也卽就利害上而論亦有多端查人民幸福以治安爲要義年來土匪竊發滋擾閭閻若非興和巡警實力保衛民間幾無甯日萬一劃歸商都則甫經設治之區警察未能完善無可諱言處其保護範圍之下安枕與否勢難逆料此其不利於公民等者一人民生計全賴交通公民等糶糧購貨莫不以柴溝堡爲指歸道出興和藉便完納田賦若劃歸商都則往返增

添一二十里之遙勞民傷財損失甚大此其不利於公民等者二社會相處人民訴訟在所難免倘遇訟事到城親友之家既可借住房舍交易之舖復可通挪旅費若劃歸商都奔走寫遠固不待言則事事亦無所憑藉此其不利於公民等者三以上三端不過僅就大概而言其餘一舉一動無不受其影響是公民等莊村劃歸商都實於公民等有百害而無一益無論如何誓死難從况商都現計已經各戶領墾荒地已將萬頃其八臺馬羣等處荒地未開墾者尙有數萬頃之多又均係膏沃之地近日風氣較開人民認領者爭前恐後將來該局荒地全行開殖後已成一極大縣治乃該局長未明開闢蒙疆之本旨抗違部議原案不籌殖邊無理要求聞劃張北縣熟地約七八千頃今又強劃興和縣熟地八千餘頃並聞劃割陶林之地亦有數千頃致令各屬人民均有惶惶不安之象不知該局長是何居心而必欲破壞此成局也且興

邑每年徵收糧地不過一萬五千餘頃決非轄境遼闊賦入充裕者可
比若再劃去八千餘頃尙復成何縣治不惟學警各款無法可籌卽地
方一切要政亦勢必隨之廢弛今以萬民安危所繫大局攸關既有所
聞實難緘默爲此不揣冒昧聯名具呈籲懇伏乞縣長鑒核俯順輿情
與商都嚴重交涉不得任意割割俾公民等不致流離失所實感德無
既矣除逕呈都憲暨各部外爲此公懇伏乞垂鑒施行又據職縣警佐
王璽呈稱爲呈請核奪事案奉第十二號委令內開本年八月二十九
日奉都統署第二千六百七十八號訓令內開據商都設治局局長郭
成鈞呈稱竊局長樗櫟庸材仰蒙培植調署商都設治局開辦伊始百
端待理查商都地點自四臺起至九臺止係由張北興和陶林三縣分
出前局長吳恩溥到差未久卽經辭職尙未劃定界址所有交界地方
權限不清凡遇命盜一切案件礙難著手且七臺八臺毗連十蘇木等

處皆係崇山峻嶺爲土匪出沒之區分隸興和陶林兩縣均離縣一百數十里大有鞭長莫及之勢似應劃歸商都就近鎮懾擬請憲檄三縣迅速會同局長查照原案妥商劃界以專責成等情前來查該局長所稱各節係爲督促設治進行起見除分令張北陶林遵照劃分外合亟令仰該縣迅卽遵照會同該局長查照原案妥商劃分以清界址而資治理並將擬定劃界開辦日期先行具報以便派員會勘此令等因奉此本知事因前任虧欠交欸甚巨現在設法嚴催不克前往惟劃界一節事關緊要未便久延自應援照張北縣辦法派員代爲勘劃查該警佐平日辦事認真熟悉地理堪以派充劃界委員除分別呈咨外合行令委該員卽遵照部議原定五六七臺界限辦理隨同陶知事前往會商勘劃立將勘劃情形詳細繪圖貼說具報以憑轉呈該員務須認真將事勿負委任切切此令計粘抄一件等因奉此警佐遵卽束裝隨

同陶知事馳往商都晤郭局長遵照部議勘劃該局長除部議原定五六七臺界限外又堅割取蒲州蘇牧之天興民安益安景興壽山等莊又九蘇木之謙瑞安厚等數莊又舊放羊羣之新民運亨利亨等莊自天降康四莊皇極恩榮浩豐蕩慶恭敬良善溫和各莊均歸商都界內警佐約計該局長割取以上莊村熟地在八千頃之多當經函陳在案旋奉鈞示來函具悉壹是查前次各部呈定商都設治原案原爲推廣墾殖拓展版圖起見並非專爲劃分各縣熟地徒事擴張範圍案卷具在足資考證希仍本照部議原案據理直爭切勿稍示退讓等因警佐遵照復與該局長據理交涉陶知事亦爲秉公善處而郭局長始終不按照部議原案劃分警佐伏思劃分界限關係非輕該局長不遵部議越外割佔祇得再爲呈請伏乞裁奪實爲公便施行各等情據此知事查該公民郝成等所呈各節尙係實在情形除與商都設治局切實磋

商仍照原案勘劃外理合據情具文呈請鈞憲鑒核俯准訓令商都設治局局長遵照原案秉公分劃俾清界限而順輿情實爲公便謹呈附內務部咨都統爲興和縣天興等莊公民郝成等呈天興等莊劃歸商都管轄與商都設治之本旨不符等情有無其事文

案據興和縣天興等莊公民郝成等呈稱商都招墾設治局局長郭擬將天興等莊劃歸商都管轄與設治局之本旨不符且妨礙滋多懇請仍隸興和等情前來查此案本部尙未接准貴都統來文究竟有無其事應否劃歸無從懸斷除批示外相應抄錄原呈咨請貴都統查明核辦並希見覆此咨

附農商部咨都統爲興和縣天興等莊公民李德發等縷陳天興等莊不宜劃歸商都管轄等情是否屬實文

據興和縣天興等莊公民李德發等縷陳天興等莊不宜劃歸商都招

墾設治局管轄各情形懇咨請令行商都遵照原案辦理等情到部查該公民等所陳保衛交通各節尙屬實在情形惟該莊等劃歸商都管轄之說是否屬實本部無從懸斷相應抄錄原呈咨請貴都統查核辦理並希見覆可也此咨

附都署令准財政部咨據興和縣天興莊公民郝成等呈稱商都招墾設治局擬將天興等莊劃歸商都恐演成事實請維持照舊辦理等

情仰局會同道廳處妥議文

六年二月二十五日

案准財政部咨開案據察哈爾興和縣天興莊公民郝成等具呈略稱商都招墾設治局有擬將天興等莊劃歸商都之說恐一旦演成事實則於地方民情諸多不利且聞劃張北縣及陶林等處之熟地各數千頃抗違部議原案乞咨察哈爾都統嚴令商都遵照部議原案辦理等情到部查商都設治局有無將天興等莊劃歸商都之議如果劃割實

在有無窒礙除批候咨查外相應抄錄原呈咨請查覆等因准此查興商劃界一案前已令行道廳局處會同核議迄今多日尙未呈覆事關設治劃界未便久延茲准咨同前因合亟抄錄原呈令行該局仰卽迅速會同興和道尹財政分廳審判處妥議具覆以憑分別咨令此令

商都招墾設治局呈請訓令興和墾務局將劃歸商都管轄之二十

八莊地畝清冊咨送過局文

六年一月二十七日

案奉總局令頒發職局招墾辦事九條內開各台餘荒夾荒應候設治局與各縣界限劃清後另由本總局令行各縣將已放各台地畝清冊交設治局查核已經各縣清丈者由設治局繼續催繳押荒未經各縣清丈者由設治局遵章清丈等因奉此遵查陶林縣之八台及十蘇木清瑞慶豐兩莊張北縣之四台及羊羣六牌業經會委三面勘劃均歸商都管轄先後繪圖會銜呈報鑒核復經興和縣王知事派警佐王璽來商會同局長

察配地勢所有興和原屬之羊羣自字天字降字恩榮浩豐蕩慶恭敬溫
和良善九莊五臺平安莊六臺世泰時和吉慶三莊七臺國正莊馬羣紫
氣東來萬民樂佑東興西成北厚凝瑞收成富安啓瑞十一莊及半個蘇
木之民安益安壽山三莊以上統計二十八莊均擬劃歸職局管轄亦經
會同王知事繪具圖說另文呈報各在案奉令前因理合呈請令知興和
墾務局遵章迅將興和縣劃歸職局管轄之上開二十八莊地畝清冊咨
送過局辦理以清界限再陶林縣已劃歸職局之十蘇木清瑞慶豐兩莊
地畝清冊向由興和墾務局代辦應請指令興和墾務局一併咨交職局
以憑查核辦理實爲公便謹呈

商都招墾設治局呈覆劉雅勤與蒙古官兵地畝之事職局無案可
稽請令陶林縣趕將八台地方各案卷等項咨送職局以便訊斷

文 六年一月二十七日

案奉鈞局指令開呈覆遵令派員勘丈八台大小英圖及丈放八台蘇計莊各荒地請鑒核一案據呈已悉查前據陶林墾務局以職局已丈八台荒地復經商都招墾設治局丈放應否卽令歸該局辦理等情呈請前來當經本總局令行該局將放給王元之地暫行撤銷在案茲據呈稱勘丈王元承領八台大小英圖山荒地共計淨上中下則地七十五頃四十一畝七分又丈放蒙民馬拉巴哈等承領蘇計荒地共計淨中下則地二十七頃二十五畝等語究與陶林墾務局解決劉雅勤與八臺官兵地畝轉轄案件有無妨碍未據聲叙應由該局咨商陶林墾務局將劉雅勤與八臺官兵地畝糾葛案件及此次王元馬拉巴哈等承領大小英圖蘇計莊各案會同妥議辦法詳擬具覆以憑了案而免糾紛除分令外仰卽遵照圖說二紙存查此令等因奉此遵查陶林墾務局丈放劉雅勤之地與八臺官兵地畝糾葛案件職局無案可稽且與王元馬拉巴哈等承領大小

英圖蘇計莊各案有無妨碍無憑懸揣况商都距陶林二百餘里往返會商辦法殊費周折現在八臺既劃歸商都管轄應請分令陶林縣及墾務局趕將八臺地方各案卷暨地畝清冊圖說一併咨送職局查核以便傳集兩造督同招墾員就近三面覆勘訊斷了案俾免歧控而省拖累奉令前因理合呈覆鈞鑒指令祇遵實爲公便謹呈

陶林墾務局呈爲遵令呈送已丈正黃旗十蘇木地畝表冊請鑒核

文六年一月三十日

案奉鈞局第二千七百二十七號訓令開案據商都招墾設治局呈稱陶林縣所屬之八臺及十蘇木地界業經會同陶委員劃歸商都管轄應請鈞局訓令陶林墾務局將已丈八臺並十蘇木地畝清冊咨交職局查核已經清丈者由職局繼續催繳押荒未經清丈者由職局遵章清丈冊報等情據此除指令外查該屬八臺十蘇木等處既經劃歸商都管轄所有

已丈該處地畝清冊卽仰該局查照咨交可也此令等因奉此查正黃旗十蘇木於上年經職局丈放荒地共計下則地一百二十九頃七十畝零七分七釐繳價領照三頃二十一畝一分一釐又地戶寄存洋七百八十八元奉令前因自應查明另繕地段表並荒欸清摺各一分呈送鈞局核收轉發該局查照辦理至八臺地方經職局已丈之地卽係八臺官兵與劉雅勤爭領地畝此案雖經辦結尙未劃界挑壕一俟辦理清楚再行呈送轉發再查文內所指十蘇木是否正黃旗之十蘇木該局長並未指明如係他旗十蘇木仍請鈞局將原表冊發還以昭慎重爲此理合備文呈請鈞局鑒核施行謹呈

都統令規定各縣局建築公署劃一辦法仰卽查照辦理文

六年三月二日

案據各該縣局等先後呈送公署建築圖式前來細加核閱要皆各自爲謀參差不一查公署爲地方行政樞紐建築伊始所需房屋必須支配適

當庶幾辦公便利光線合宜固不必沿用舊習徒事鋪張無裨實際本都統對於建築工程曩昔躬歷其事凡東西屋不適用於純建北房屢經試驗咸以爲便該縣局等地居塞北亟應妥定形式以開風氣藉壯觀瞻茲特參酌規定建築公署劃一辦法繪圖一紙公署面積以四十丈見方爲度署前留隙地八丈或十丈後留隙地三五丈左右各留隙地三五丈以爲將來辦公不敷再行擴充之預備內建房屋均係北房南向每列距離各三丈所需材料仍照原呈購定應用至監獄建築應遵照部定式樣辦理除分行各該縣局遵照外合將圖式一張令發該總局仰卽查照此令

商都招墾設治局呈請轉令興和縣將劃歸職局管轄之二十八莊

未結民刑各案解局辦理文

六年二月四日

本年二月二日奉都統訓令開案據興和縣知事王瑞霖呈稱案查接管卷內民國四年五月十八日民人趙財狀訴鄔蓆芳霸地一案五年七月

二十五日民人張世奎訴張發銀等地畝糾葛一案以及薛增奎控王有福喬鳳山控吳守寬等各案其他押荒舊欠因地畝糾葛不清地戶不肯呈繳者尙不一而足皆因冀占奎卽冀六子放地不明滋生訟端歷經傳喚該冀占奎以商都局務推諉避不到案冀占奎一日不到該案一日不能結束積案清理有礙進行除逕呈審判處道尹墾務總局外理合呈請鑒核俯賜轉令商都招墾設治局就近拘獲冀占奎解送職縣歸案以便審理施行等情據此合亟令仰該局長卽便遵照辦理此令等因奉此並奉審判處令同前因遵查民人趙財狀訴鄔蓆芳等霸地民人張世奎狀訴張發銀等地畝糾葛以及薛增奎控王有福喬鳳山控吳有寬等各案皆因距興和縣一百四五十里不能親往履勘調查實在情形且興和縣差傳案不力玩法舞弊是爲慣技局長前辦興和墾務時有所聞以致興和田土細故狀訴經年累月未能判決積案多起小民拖累不堪卽遇有

搶劫重案亦復鞭長莫及不能保護維持仰蒙都統體恤民艱創設治局
 援照縣知事兼理司法事務暫行條例並代理所轄境內一切訴訟事宜
 爲邊陲人民之保障茲查該民人等所爭地點悉在五六臺附近已經劃
 歸商都管轄自應將卷宗人證一併解歸職局督同兩造就近勘丈清界
 從速審判以清塵牘而符定章至押荒舊欠一節業經遵照招墾辦事大
 綱呈請總辦指令興和墾務局將興和劃歸商都之二十八莊地畝清冊
 咨交職局查核繼續催繳押荒究竟冀占奎名下實欠押荒銀若干一俟
 清冊咨到職局卽行勒差傳案從嚴押追其餘欠繳各戶亦不難按冊追
 繳源源報解俾重正欵奉令前因所有民人趙財等各案應由興和縣將
 人卷解歸商都審判暨差傳冀占奎追繳押荒緣由理合呈請總辦鑒核
 指令祇遵再興和縣劃歸商都管轄之二十八莊凡未結民事刑事各案
 應請訓令興和縣一併解歸職局就近傳證審判以免拖累實爲公便除

呈都統暨審判處外謹呈

都統令據興和縣知事商都招墾設治局局長劃界委員呈稱會劃興屬馬羊羣五六七台等處界址等情仰局會同道廳處核議具

覆文

六年二月六日

案據興和縣王知事商都招墾設治局郭局長劃界陶委員會同呈稱竊知事瑞霖奉都統訓令開據商都招墾設治局局長郭成鈞呈稱竊局長以樗櫟庸材仰蒙培植調署商都招墾設治局開辦伊始百端待理查商都地點自四台起至九台止係由張北興和陶林三縣分出吳前局長到差未久卽經辭職尙未劃定界址所有交界地方權限不清凡遇命盜一切案件礙難着手且七台八台毗連十蘇木等處皆係崇山峻嶺爲土匪出沒之區分隸興和陶林兩縣均離縣一百數十里大有鞭長莫及之勢似應劃歸商都就近鎮懾擬請憲檄三縣迅速會同局長查照原案妥商

劃界以專責成等情前來查該局長所稱各節皆爲督促設治進行起見除分令張北陶林遵照劃分外合亟令仰該縣迅卽遵照會同局長查照原案妥商劃分以清界址而資治理並將擬定劃界開辦日期先行具報以便派員會勘此令等因奉此正在會商間卽奉令委員樹猷會同勘劃前來知事瑞霖因催算交代不克親詣會勘當委警佐王璽馳抵商都三面會劃該警佐因半個蘇木未經議案載入不敢擅專回興稟請酌辦茲復委王警佐赴商會同局長察酌地勢東界自古力半諾起以厚生利新北壕塹爲界中界以皇極新民康字三莊北界爲界南均歸興和管轄界北均歸商都管轄西界以半個蘇木廣瑞奎南壕塹爲界以南三成局所放之地均歸興和管轄以北均歸商都管轄所有興和原屬羊羣降字恩榮浩豐蕩慶恭敬溫和良善七莊馬羣紫氣東來萬民樂佑東興西成北厚凝瑞收成富安啓瑞十一莊及五台天宇自字平安三莊並梁萬楨

劉元等所放之地六台世泰時和吉慶三莊七台國正莊暨半個蘇木之益安民安壽山三莊以上統計二十八莊均擬劃歸商都管轄奉令前因除再會銜出示曉諭居民週知外所有委員等勘劃興和縣馬羊羣五六七台及半個蘇木廣瑞奎南壕塹等處界址緣由理合繪具圖說呈請鑒核指令備案再三面會商妥協半個蘇木之民安益安壽山三莊現雖劃歸商都管轄所有嗣後歲征警捐仍由商都悉數解歸興和以重警餉合併聲明計呈興商劃界圖說一紙等情到署查該縣局呈報各節業令會同核議在案茲據該縣局委員等會呈前來合亟照繪圖說一紙令行該局仰卽會同興和道尹財政分廳審判處併案核議尅日具覆以憑分別咨令此令

商都招墾設治局呈報商都警察成立日期文

六年二月十八日

案奉都統指令據職局呈據紳民劉元姚萬成穆三洪張繼成等稟請每

頃地捐銀元一元籌辦商都東區警察以消匪患而靖地方等情奉令准予照辦並發給老毛瑟步槍四十五枝單筒馬槍十五枝均帶子彈三百枚派員具領至應繳槍價一千七百八十五元並准展限呈解等因先後令知在案職局遵卽派員具領業於二月十二日將奉發槍彈如數運回商都編練警察茲查有前充興和縣警察區官郭萬春精明穩練堪以委任商都東區警察區官已於本月十六日帶同稽查偵探各員並警兵三十名前赴四五台扼要地方設局駐紮職局同日招募警兵十名以資緝捕奉令前因除逕呈警務處長道尹財政分廳外所有商都警察成立日期理合呈報總辦鑒核備案指令祇遵除分呈都統暨警務處長道尹財政分廳外謹呈

墾務總局指令商都招墾設治局據呈報警察成立日期文

日
月六年
十年三

如呈備案並候都統暨道廳處令遵可也此令

都統令據興和縣知事呈稱奉令勘劃商都地界現經剴切曉導該

公民郝成等亦無異言卽作完結等情仰卽知照文

六年二月十八日

案據興和縣知事王瑞霖呈稱案奉都統訓令內開案查該縣與商都劃界一案當經令派陶委員會同勘劃去後迄今兩月有餘該知事尙未呈覆事關設治進行未便懸案以待合亟令仰該知事迅將該縣地面劃出若干尅日繪圖呈覆以憑核奪切切毋違此令等因奉此查此案前據天興等莊公民郝成等聯名具呈請願不願劃歸商都管轄等情並據該警佐以商都招墾設治局局長不遵部議原案任意要求等情呈復前來知事已於五年十二月十九日據情呈請都統令遵在案茲奉前因當令該警佐前往商都招墾設治局切實交涉妥爲商劃去後嗣據該警佐呈稱遵卽束裝馳往商都招墾設治局偕同郭局長詳細履勘妥爲商劃除遵

照部議五台之自字天字平安莊及梁萬楨劉元等放墾之地六台之世泰時和吉慶等莊七台之國正莊及台道以北馬羣之十一莊均應劃歸商都境內此外郭局長緣劃分五六七等台村莊犬牙交錯恐與管轄兩不便利隨又再三要求警佐復加履勘實屬南壑北缺大相交錯是以復與該局長磋商勘劃又將羊羣之降字恩榮浩豐蕩慶恭敬良善溫和等七莊蒲州蘇牧之民安益安壽山三莊共計十莊劃歸商都招墾設治局轄境惟劃歸商都蒲州蘇牧之民安益安壽山等莊興和每年隨同糧租徵收畝捐以及區錢等項捐款警佐以興和警餉不敷業與郭局長交涉妥洽嗣後歷年應由設治局仍照前數隨糧帶征每於年終征齊悉數移解興和仍歸警餉項下以作協濟之款郭局長已慨然承諾立案所有奉令勘劃緣由是否有當理合將勘劃交界與郭局長簽字蓋章圖說呈請鑒核施行計呈送勘劃交界圖說一張等情據此查職縣與商都地界業

經商劃妥協已於日前會同呈報在案至公民郝成等聯名具呈請願一節現經知事傳集剴切曉導該公民等亦無異言應卽作爲完結茲據前情理合繪圖具文呈請都統鑒核俯賜備案實爲公便等情據此除指令外合亟令仰該總局知照此令

墾務總局令張北沽源兩縣知事兩翼商都兩局局長頒發放賣街

基章程並空白執照式樣仰卽查照辦理文

六年三月一日

查本總局籌擬本區設治及遷治地方放賣街基一案業經擬訂章程規定照式呈奉都統指令開呈暨章程執照格式均悉仰候分咨立案此令等因奉此查本區所屬張北沽源兩縣均僑屬直隸境內萬全赤城縣等處業於上年籌議遷治在案商都招墾設治局早經成立兩翼牧廠亦正在籌備設治期間雖地方情形各有不同而街基統歸官放應歸一律所有前項章程均應適用爲此抄發原呈並放賣街基章程一份空白執照

一張令仰該

縣知事局長

查照辦理俟有應用執照之時卽由該

縣局

備文領用

此令

墾務總局指令商都招墾設治局據呈支配槍彈編練警察懇請緩

繳槍價並呈興商劃界草圖文

六年三月一日

據呈已悉仰候都統指令示遵草圖存此令

墾務總局指令商都招墾設治局呈請支配槍彈編制游擊守衛隊

並請緩繳槍彈價洋文

六年三月一日

呈悉該局長編練警察保衛地方既經呈奉都統令准發給槍枝子彈應
卽派員具領以資興辦所請緩繳槍彈價洋之處仍候都統指令遵行此
令

墾務總局令

兩翼牧場濟文行局局長

將太僕寺牧場界內所有元

致和寶昌州碑文拓印一份火速送局文

六年五月六日

查太僕寺牧場設治一案曾經內務財政陸軍農商四部會核呈奉

大總統批令照准惟查原呈內開至原請定名爲太僕招墾設治局一節查兩翼地址本統名太僕寺此次開放餘荒係一部分之事若以之命名誠恐墾務牧政名實相混應由該都統就設治局地址妥定名稱咨明內務部核定以昭慎重等語亟應遵照改擬名稱以符原案現奉都統面諭據左翼薩總管面稱太僕寺牧場界內有唐致和寶昌州碑文但查唐代無致和年號惟元泰定帝時改元致和此碑是否卽元泰定帝時所立應卽由該總管會同該行局局長考查明確立將原有碑文拓印一份火速送局以憑稽考而定名稱除分令外合亟令仰該

局長

遵照勿延此令

商都招墾設治局局長郭成鈞函稟設治招墾情形文

十六年五月十二日

總辦鈞鑒自違慈宇時繫孺私侯价來奉手諭謹悉藉謫福躬安泰憲眷康甯無任忻頌職局建築材料一律齊備已招募工頭三部分同時興工

限令陰歷六月內落成新卜城基掘井兩口不過兩丈餘深水卽湧出地方同深慶幸邇來興和隆盛莊等處商民前來購地以備修築市廛者絡繹不絕約計兩三月後市面卽可成立墾務亦日有起色近來領地者甚多德爾沁保台永祿等領墾大小鹽諾及大馬羣荒地黃君秦生領墾公雞道荒地均允赴口呈繳押荒攜帶收據來職局換領部照孟都巴雅爾承領羊羣荒地先後繳洋三千數百元早已源源解口並隨時填發部照管業職局仍促其迅速繳欸以憑報解現據領墾五菊花等處荒地之方君希申繳票洋一千八百元已彙同他欸專案另文呈解三千二百元至工程經費僅付木行及磚瓦灰石並各工頭領欸二千餘元嗣後催收押荒除陸續酌發工費外卽行儘數報解職局僻處蒙荒不敢多存公款以昭慎重請紓慈廩再職局劃界興和較多所有馬羊羣及各台地戶墾熟地畝尙未領照押荒升科納糧者爲數甚鉅因距興邑遼遠朦混多年現

在興商界限業已劃清職局呈請轉令興和墾務局將劃歸商都之二十莊並十蘇木清瑞慶豐二莊已丈地畝荒冊一併送由職局核辦業奉鈞局指令施行迄今未准送到仰懇令催興和墾務局查照定案迅將前項荒冊咨送過局以便調查切實核辦爲叩肅復恭頌助安伏乞垂鑒

墾務總局令商都招墾設治局切實遵照都統指令仍儘原定額欸

務將衙署監獄營房一律修齊文

六年四月十六日

前據該局呈送招商投標估計局署監獄營房三項建築費清摺圖說到局查閱呈內聲叙各節及摺開估計數目核與原定額欸計多出三千八百六十元當經本總局指令擇要趕速興工仍照一萬元定額另造工程清單合同圖式呈候核轉並一面具呈都署擬以七台原有設治局舊房撥駐防軍暫將營房剔出緩修在案茲奉都署指令開呈悉查商都招墾設治局應行建築衙署監獄營房等項前經核定共計建築費洋一萬元

當時原係按照該處地方情形就完全工程估計定案若果核實經營自無不敷之慮茲據呈稱現經世義永估價尙不敷洋三千八百餘元該總辦擬將營房剔出緩修既與原案不符且營房之建築當與衙署監獄並急其建築營房費已包括預算以內尤不得藉口不敷遽議剔出亦無另撥地欸補助挹注之必要仰仍轉令該局長遵照原案樽節經費核實興修勿任稍涉浮濫以重公欸至監工委員津貼本應由建築費內開支惟既經該總辦等擬爲通融辦理請在該地街基項下動用從寬姑且照准併卽由該總局加以委任轉令知照可也此令等因奉此該局長應卽切實遵照仍儘原定額欸務將衙署監獄營房等項一律修齊一切構造務求堅固毋得遺漏短少並不得虛飾浮濫除另委監工委員臨場切實監察外合亟令行遵照切切此令

墾務總局指令商都招墾設治局呈爲遵令停辦鹽捐暨擬收地租

以充警察經費呈請令遵文

六年四月十九日

呈悉據稱擬酌收察汗等諾地租以充警察經費等情既據逕呈仰候都
統令遵可也此令

張北縣知事呈移治興和城放賣街基章程文

(放賣街基章程附)六年五月二十六日

案查前奉鈞局令發遷治地方放賣街基章程並抄發原呈暨執照式樣
令卽查收遵辦等因奉此知事遵卽隨帶員警親詣遷治之興和城地方
周歷履勘查附近村莊稀少地處荒涼四圍土城僅存痕跡已與平地相
同城內人烟寥寥大小商舖居民約亦不過數十餘戶隨卽指定建築縣
公署及監獄地點其餘空閑地段除四門城根大小街道並留備建築學
警等項公用房屋及文武廟宇基址外共計餘剩丈放街基六頃有奇當
卽體察情形插立木樑規定四等每畝價格擬一等洋三十元二等洋二
十五元三等洋十五元四等洋十元餘則悉遵奉發章程辦理惟尙有重

大困難問題反覆籌思必須審慎於始不厭求詳方免貽悞一卑縣與他縣局遷治情形不同興和城與現駐之張家口縣公署相距百里商民請領街基及派員司陸續往返丈放不特商民不便彼此觀望抑且員司往返奔馳旅費浩繁兼亦須稽延歲月而况一切應公建築經費尙無著落待欸孔殷是以不得不委派員司於興和城內設立丈放街基處所以便就近隨時放賣約計數月定可領放完竣無如一切員司夫役人等薪工紙張經費無從籌措一口外地方山巒重疊野曠人稀土匪得以出沒靡常今以縣署監獄重要機關遷移其地稍有疎虞所關匪細設於荒僻之區不先預爲籌畫深恐商舖居民因無軍警防守相率視爲畏途裹足不前於開放街基大有障礙勢必須先行籌畫添招馬步巡警晝夜站崗梭巡方足以資保衛而期治安奈此項餉糈一時委難籌備况轄境遼闊原設警額無多尤難再行調撥轉致掛漏查放賣地價自應遵章留充一切

應公建築之需則此二端亦當兼籌並顧趕爲設法籌及方克有濟茲擬定於放賣四等每畝地價外各按等再加以二成辦公費統計約亦可籌銀二千數百餘元以一成卽作爲該所員役薪工筆墨紙張之用以一成補助添招馬步巡警餉精第爲數無多再請將照章應收一成丈費援照舉局按四成報解成案以六成亦作爲該添招巡警餉項如此辦法於商民所費無幾集腋成裘可成鉅款且於遷治荒涼地面鄉民相率僦來自必日見發達蔚然可成繁盛之區除委員司前往設所丈放並訂立街基章程出示招領外理合將擬具辦法縷晰陳明並抄錄章程具呈送請總辦鑒核俯賜備案再街基執照現在商民報領者日見踴躍應請將印就空白先行發縣三百張以便隨時填用轉給祇領俾資管業一俟用罄再行繳送存根呈請續領實爲公便合併聲明謹呈

附訂立招領興和城街基地皮章程

第一條 興和城內外承領街基地畝悉遵本章程辦理

第二條 城內東西南北四門大街寬以二丈爲度縣署前面大街寬以三丈爲度

第三條 除城內大小街道外餘剩街基地皮均按二百四十弓爲一畝無論舊日私佔官地所設商舖居住民房概從寬免既往不究亦不追索以前租價以示體恤統自民國六年四月起與空閑地畝一律分別四等招商民承領

一等每畝洋三十元

二等每畝洋二十五元

三等每畝洋十五元

四等每畝洋十元

每戶按等繳價外再加墾務局丈費一成照費洋一元註冊費一角

縣公署辦公費二成均報由本公署所派委員分別先後挨次就近丈放以一箇月爲期各按等繳納地價如逾限不繳或繳不足數無論已未建築房屋概行退地撤銷另招他人承領已建築房屋概行充公

第四條 凡城內衝要正街地基爲一等側街地基爲二等後街地基爲三等城角及偏僻之處四門外城壕地段均爲四等

第五條 凡商民承領街基按照墾務局所訂街基章程每戶至多不得過二段每段以寬二十弓長五十弓按畝分等繳價以杜囤留包攬之弊亦不得將承領之地轉賣於外國人及抵押違者充公

第六條 無論新舊商民承領地段自繳價後均限半年內將房屋建築齊全倘限內並不建築房屋仍將地價退還撤回執照另行招領其已繳之丈費照費及辦公註冊等款概行充公

第七條 城內商舖居民住屋均須建蓋整齊不得任意自行伸縮稍有參差開立門戶亦須東西南北彼此相向以免雜亂無章並不准開設大小旅店卽駛運貨店棧亦須開設於四城門內以便稽查而免乞丐游民混跡其中易生宵小

第八條 凡商民承領街基地畝自民國六年起各戶於繳價發照後不論等第每畝每年均赴縣公署繳納學租銀三角辦公費一角

第九條 商民承領地段報由委員丈明後按戶分別等第收齊應繳欸項隨時報解縣公署註冊分期轉報墾務總局發給執照以資執業

第十條 本章程如有未盡事宜隨時酌量增刪

墾務總局指令張北縣知事呈移治興和城放賣街基章程文

六年
六月

呈覽章程均悉據稱興和城與該縣現駐之張家口縣公署相距百里商民請領街基及派員司陸續往返種種困難尙係實在情形所請委派員司於興和城內設立丈放街基處所以便就近隨時放賣係爲便利敏捷起見自可照辦惟所擬於放賣四等街基每畝地價外各按等再加以二成辦公費以一成作爲該所員役薪工紙筆之用以一成補助添招馬步巡警餉糈未免加重商民負擔應由該知事切實體察地方情形如果確無障礙自可准予試辦仍應將所收二成辦公費覈實開支實用實銷並照章取具証憑單據報由本總局查核轉呈都署核銷至於一成丈費應全數報解本總局不得稍有截留查本總局呈蒙都統分咨內務財政農商部核準備案之察哈爾設治放賣街基章程第九條內載放賣街基之一成丈費及執照註冊費應由各縣知事局長隨時報解墾務總局核收不得移作他用等語則所收一成丈費自應全數解交本總局列收沽源

縣及商都招墾設治局放賣街基一律如此辦理該縣未便歧異所請援照各縣墾務局成案擬以四成報解以六成作為添招巡警餉項之處放賣街基與開放荒地情形實有不同碍難援照准行所請應無庸議至所擬招領興和城街基地皮章程十條候一併據情轉呈都統查核令遵茲隨令頒發張字第一號至二百號用印空白街基執照二百張仰即查收俾便填用並即具報以憑備查一俟用罄即行繳送存根再請續發可也此令

沽源縣知事呈移治小河子放賣街基辦法文

六年四月二十四日

案奉鈞局訓令第三千零六十五號令開為訓令事查本區遷治及設治各縣局放賣街基官地一案業經本總局擬定章程規定照式呈奉都統核准並將章程照式頒行各該縣局遵照辦理在案該縣遷治在邇一切佈置漸次就緒所有放賣街基一事是否遵照本總局呈准通行辦法辦

理未據據實呈報無憑查核仰該知事務須遵照前令守定頒發章程切實辦理不得自爲風氣稍與定案相違應需執照著卽具文來局請領仍將辦理情形隨時呈報候核可也此令等因奉此案查前任劃出街基路線及尺丈之長短面積之寬狹節經知事兩次勘驗與前奉都統頒定圖說暨鈎局發行章程多未符合知事因責任攸關斷不敢操切從事徒糜公帑亦曷敢因循遷就致滋貽誤籌思至再惟有將前任擬就街圖取銷仍遵總辦頒定程式迅由原包工人另繪街基草圖請示核准而後依次進行知事正在督飭趕辦間復奉訓令催領放賣街基執照所有請領遲滯緣由理合具文先行呈覆伏乞垂鑒無任禱切謹呈

墾務總局指令商都招墾設治局呈爲遵照頒發城基圖式相度地

勢籌辦情形請備案文

六年四月二十日

如呈備案既據逕呈仍候都統令遵可也圖存此令

都統通令各屬爲奉准設立太僕招墾設治局並將商局改稱商都

招墾設治局刊發關防以憑啓用文

(樂務總局承辦堂稿) 六年四月二十五日

案查本都統呈請援案設立太僕招墾設治局藉以推廣墾殖保護居民並請准將商都墾務行局兼設治局改稱商都招墾設治局以歸一律一案奉 大總統發下國務院函交內務財政陸軍農商四部會同核議

具覆節經四部核議照准會同呈覆於民國六年四月二日奉 大總

統指令呈悉准如所擬辦理卽由各該部轉行察哈爾都統遵照此令等

因奉此除太僕招墾設治局名稱候另行酌定再行咨明內務部核定以昭慎重外所有該局開辦常年各經費及設治地點所在並管轄區域地圖應由該局長林茂亭迅卽遵照分別造送以憑轉咨各主管部核奪至商都墾務行局兼設治局既奉核准改稱商都招墾設治局應卽遵照改稱今名以昭劃一茲由本都統刊刻關防頒發該局以憑啓用所有該局

舊用關防一顆應卽繳銷除通行外合亟抄發原呈二件

並本質關防一

類令仰該局卽便遵照辦理領啓用仍將啓用日期具報查核也此令

墾務總局指令沽源縣知事據呈放賣街基執照請領遲滯緣由文

六年五月十八日

據呈已悉所有該縣放賣街基應需執照一俟該縣街基圖式規畫就緒仰卽具文來局請領以備填用而符定章此令

都統咨內務部以太僕招墾設治局改稱寶昌招墾設治局文

(墾務總局)

承辦(彙稿)六年六月八日

查察區太僕寺牧場設治一案曾經大部會同陸軍財政農商三部核議呈奉大總統指令照准在案惟查原呈內開至原請定名爲太僕招

墾設治局一節查兩翼地址本統名太僕寺此次開放餘荒係一部分之事若以之命名誠恐墾務牧政名實相混應由該都統就設治局地址妥

定名稱咨明內務部核定以昭慎重等語應卽遵照辦理改擬名稱以符原案查口北蒙疆悉屬白草黃沙之壤在有宋以前未入中國版圖地方名稱多由蒙語譯漢駁雜支離難以依據迨夫金元代易版圖擴張統馭蒙疆聲教漸及於遠查現今設治區域左翼場內有元代所建鑲黃旗廟基其舊漢文慶國禪寺重修佛殿碑至今猶存代遠年湮蘚苔剝蝕其中文字殘斷過半惟前數行尙可辨識考此碑係元致和元年太歲戊辰六月所立而建碑者多係當時興和路寶昌州職官考一統志興和城在太僕寺左翼牧場西南二十里南至張家口百里本金時撫州元史地理志興和路唐屬新州金置柔遠鎮後升爲縣又升撫州屬西京中統三年以郡爲內輔升隆興路總管府建行宮領縣四高原懷安天成威甯州一寶昌州考之志乘證以碑文則現今設治地點其爲元時寶昌州舊址似確有徵查民國成立以來因全國縣名相同者多業經分別查明更易以示

區別而免混淆類多起易古時名稱實於祛除重複之中隱寓保存古蹟之意現在太僕寺牧場設治既因太僕二字命名恐與墾務牧政相混擬卽沿襲元代寶昌州舊名定名爲寶昌招墾設治局將來招墾事竣設治告成卽逕稱爲寶昌縣用符名實而垂久遠所擬是否可行相應咨請大部查核轉呈暨分咨財政陸軍農商三部備案並希見覆此咨

墾務總局指令商都招墾設治局據呈覆建築衙署城街情形並繪

具城基細圖實呈鑒核文

六年六月三十日

呈件均悉該局建築局署監獄營房三項應儘原定建築費一萬元定額另造工程清單合同圖式送局以憑轉呈都統咨部立案迭經令飭該局長遵照辦理在案茲閱來呈僅據另繪城基圖說呈送前來其建築局署監獄營房三項工程清單合同圖式仍付闕如殊爲不合仰速遵照前令務儘核定一萬元定額以內補造建築局署監獄營房三項工程清單合

同圖式尅日呈送本總局以憑轉呈請咨仍一面趕緊督工核實構造勿使公家欸項稍涉虛糜是爲至要至該局原定城基旣因掘井無水自不得不另擇相當地點以爲城基所有另具街道圖說應准備案前呈街基地圖並准隨令發回仰卽註銷可也此令

都統令據沽源縣知事呈稱建築縣署監獄不敷之欸毫無著落擬令各汛分擔若干再加放賣街基入欸充補等情仰局會同興和

道尹查議具復文

六年七月十六日

案據沽源縣知事劉鐵山呈稱竊知事接任以來對於建築一事籌畫進行不遺餘力以圖勉副都統諄諄告諭之意惟檢查卷內並無應用材料及工程做法各項清單足以應需工料毫無根據決不敢冒然從事致誤要公當經令原估工匠劉芝泰核實估計復經監修陳委員逐條核減縣署工料需洋八千八百六十餘元監獄工料需洋四千八百四十餘元載

運材料費需洋二千六百九十餘元統共需洋一萬六千三百九十餘元查核所列各數比較實在價值有絀無盈萬不能再行核減比照呈領建築費尙不敷洋五千三百九十餘元毫無著落若概行出自公家固苦於籌措無門卽悉數攤派於民又慮其負擔過重知事再四思維惟有仰懇都統俯准照張北縣建修成案所有載運費二千六百九十餘元擬令各汛花戶分擔其尙不敷之二千七百餘元則以放賣街基入款充補之如此辦理於經費可資挹注卽於建築可望進行且與張北縣事同一律各汛亦不致嘖有煩言知事業與縣屬各紳迭次接洽僉稱平允現在雖已開工只因尙無一定把握故佈置一切不得不稍爲遲緩茲造具建築材料工價一覽表暨工程做法單一紙隨文呈送仰祈迅爲批示俾便祇遵以期早日落成實爲公便附工價表等件等情前來除指令呈暨工價表等件均悉查載運費一項由各花戶分擔張北縣並無此項成案該知事

既與各紳等接洽允行應准照辦至不敷建築費二千七百餘元擬以放賣街基入款充補等情曾據興和道尹呈擬投標辦法令行該縣遵照在案惟查該知事此次另文所擬放賣地畝價目與前案微有不符仰候令行

興和道尹
興務總局

議覆以憑核奪令遵可也此令印發外合亟令仰該總局會同興和道尹查議具覆以憑核辦此令

都署令據沽源縣知事呈稱仿照張北招領興和城基地畝辦法擬具章程十一條請鑒核等情仰局會同興和道尹查議具復文

章程

附)六年七月十八日

案據沽源縣知事劉鐵山呈稱查沽源建築新署業已開工所有城內街基地畝亦應即時放賣以便承領各戶趕速興修惟查小河子地勢低窪招領已屬較難又兼口外天寒結冰甚早領戶建蓋房屋爲日無多各等地價若不較爲低次不但承領者裹足不前而且城內各街亦恐無期齊

整前由知事仿照張北招領興和城街基地畝辦法擬具章程十一條隨文呈送是否可行仰祈鑒核示遵實爲公便附呈章程一扣等情據此除指令外合抄章程令發該總局會同興和道尹查議具覆以憑核辦此令

附沽源縣招領城內街基地畝章程

第一條 本章程於承領沽源新城內街基地畝者悉適用之

第二條 縣署左右南北大街及縣署前東西大街均以寬六丈爲度
其他經緯小街均以寬三丈爲度

第三條 除城內大小街道外所餘街基均以二百四十弓爲一畝承領者須按照後開等第分別繳價管業

一等 每畝洋二十五元 二等 每畝洋二十元

三等 每畝洋十五元 四等 每畝洋十元

每戶按等繳價外仍須繳納墾務總局丈費一成照費銀洋一元

註冊費一角縣署辦公費二成均與地價同時繳納

第四條 凡衝要正街地基均爲一等側街地基均爲二等東西南三門內附近城根各地基均爲三等北門內附近城根地基及第一橫街地基均爲四等

第五條 凡商民承領地基按照墾務總局所定街基章程每戶至多不得過二大段每大段寬以四十弓爲度但一大段可分爲四小段分別承領

第六條 凡承領之地永遠不得轉售與外國人該地於未蓋房之先亦不得作爲抵押品違者卽將地畝充公

第七條 凡承領地畝均限半年內將房屋建蓋齊全如有不依限建造者卽將原領地段收回另行招領除將原價退還外其丈費照費註冊費及縣署辦公費概不退還

第八條 建造房屋時均須遵照所劃街道界線不得自行伸縮以昭齊整

第九條 承領地畝各戶自民國六年起不分等第除應納國課外每年每畝仍須繳警備隊餉銀三角並縣署辦公費二角

第十條 凡承領地基者均須赴縣公署接待室按圖指明段落復卽赴沽源興業銀行繳納現款再行分期轉報舉務總局發給執照以資信守如以空函及空言承領者概爲無效

第十一條 本章程如有未盡事宜得隨時修改之

舉務總局
興和道尹

會呈都統爲遵令會同查議沽源縣放賣街基章程暨所擬以此次入款充補建築費不敷之二千七百餘元分別准駁呈

請鑒核文

六年八月十日

案奉鈞署第一零二一第一零二二三各訓令開案據沽源縣知事劉鐵山

呈稱建築新署擬將城內街基地畝仿照張北招領興和城街基地畝辦法擬具章程十一條卽時放賣以便各戶趕速興修並請於此項入款內充補建築費不敷之二千七百餘元以期早日落成各節其此次所擬放賣地畝價目與前案微有不符令卽會同查議具覆等因奉此查該縣所擬章程第三條規定一二三四等地畝價率其一二兩等價目較之張北放賣興和城街基每畝相差五元如果地方情形實有不同自可准其變通辦理以廣招徠但於正價丈費照費註冊費外加收縣署辦公費二成是又未免加重商民負擔况所收辦公費並未指明用途誠恐易滋流弊查二成辦公費現在張北雖准隨收係因該縣先行委派員司於興和城內設立丈放街基處所隨時放賣並在該城先行籌畫添招馬步巡警保衛治安所收辦公費二成以一成作爲該所員役薪工紙筆之用以一成補助添招馬步巡警餉糈是以姑准試辦如果稍有窒碍仍不准行似未

便遽援爲例再查該章程第九條承領地畝各戶自民國六年起不分等第除應納國課外每年每畝仍須繳警備隊餉銀三角並縣署辦公費二角查警備隊係爲保衛地方而設有益商民每畝街基每年征收警備隊餉銀三角係爲保衛商民起見尙屬可行惟每屆年終應由該縣知事將全年共收警餉若干及如何支銷按月列冊呈報道署及警務處查核以昭慎重而重欸項至縣署辦公原有一定經費所擬每年每畝隨征縣署辦公費二角未免過多擬請援照張北成案准收一角此外各條均尙妥洽可行擬請照准以資遵辦至該縣建築縣署及監獄兩項所有不敷建築費二千七百餘元擬以放賣街基入欸充補一節如果工料確係覈實呈領之費實是不敷以公欸移作公用亦可照准俾早竣工所有遵令會同查議情形所擬是否有當理合會銜具文呈請都統鑒核施行再此呈係由墾務總局主稿合併聲明謹呈

內務部咨察哈爾都統准咨稱將太僕招墾設治局改稱寶昌招墾

設治局應卽准其定名文

六年八月二十二日

案准貴都統咨稱察區太僕寺牧場設治一案曾經會呈奉准在案原呈內稱兩翼牧場本統名太僕寺若以之命名誠恐墾務牧政名實相混應就設治局地址妥定名稱咨明內務部核定等語應卽改擬名稱以符原案查設治區域左翼牧場內有元代所建廡黃旗廟基其舊漢文慶國禪寺重修佛殿碑至今猶在其中文字殘斷過半惟前數行尙可辨識考此碑係元致和元年所立建碑者多係當時興和路寶昌州職官考一統志興和城在太僕寺左翼牧場西南二十里南至張家口百里元史地理志興和路領州一爲寶昌州考之志乘徵以碑文則現今設治地點其爲元寶昌州舊址似確有證擬卽沿襲元代寶昌州舊名定名爲寶昌招墾設治局將來招墾事竣設治告成卽逕稱爲寶昌縣用符名實而垂久遠是

否可行咨請查核呈咨並希見覆等因並附送碑文一紙到部查原請改定設治局名稱稽之史乘考以碑碣地勢洵屬可徵且於現在全國縣名並無重複應卽准其定名寶昌招墾設治局以符名實除咨呈國務院查照備案并咨行財政農商陸軍三部查照外相應咨行查照可也此咨